

The copy filmed here has been reproduced thanks to the generosity of:



National Library of Canada

The images appearing here are the best quality possible considering the condition and legibility of the original copy and in keeping with the filming contract specifications.

Original copies in printed paper covers are filmed beginning with the front cover and ending on the last page with a printed or illustrated impression, or the back cover when appropriate. All other original copies are filmed beginning on the first page with a printed or illustrated impression, and ending on the last page with a printed or illustrated impression.

The last recorded frame on each microfiche shall contain the symbol \longrightarrow (meaning "CONTINUED"), or the symbol ∇ (meaning "END"), whichever applies.

Maps, plates, charts, etc., may be filmed at different reduction ratios. Those too large to be entirely included in one exposure are filmed beginning in the upper left hand corner, left to right and top to bottom, as many frames as required. The following diagrams illustrate the method:



L'exemplaire filmé fut reproduit grâce à la générosité de:

Bibliothèque nationale du Canada

Les images suivantes ont été reproduites avec le plus grand soin, compte tenu de la condition et de la netteté de l'exemplaire filmé, et en conformité avec les conditions du contrat de filmage.

Les exemplaires originaux dont la couverture en papier est imprimée sont filmés en commençant par le premier plat et en terminant soit par la dernière page qui comporte une empreinte d'impression ou d'illustration, soit par le second plat, selon le cas. Tous les autres exemplaires originaux sont filmés en commençant par la première page qui comporte une empreinte d'impression ou d'illustration et en terminant par la dernière page qui comporte une telle empreinte.

Un des symboles suivants apparaîtra sur la dernière image de chaque microfiche, selon le cas: le symbole \longrightarrow signifie "A SUIVRE", le symbole ∇ signifie "FIN".

Les cartes, planches, tableaux, etc., peuvent être filmés à des taux de réduction différents. Lorsque le document est trop grand pour être reproduit en un seul cliché, il est filmé à partir de l'angle supérieur gauche, de gauche à droite, et de haut en bas, en prenant le nombre d'images nécessaire. Les diagrammes suivants illustrent la méthode.

ST. MARK'S KLOOSH YIEM

KOPA NESIKA SAVIOUR

JESUS CHRIST

LONDON

BRITISH AND FOREIGN BIBLE SOCIETY

1912

**THE GOSPEL ACCORDING TO ST. MARK IN
CHINOOK JARGON**

TENTATIVE EDITION

ST. MARK

Chapter 1.

Okook kloosh yiem kopa Jesus Christ; 1
Sah-a-lee Tyee tenass.

Kakwa okook ankutee prophets ma- 2
mook tzum, " alki nike mash ikt man
elip kopa mika, spouse mamook kloosh
mika wayhut."

Kakwa spouse hyas wawa midlite kopa 3
wilderness, " kloosh mesika mamook
wayhut kopa Sahalee Tyee, mamook
delate yaka wayhut."

John yaka baptize tillicum kopa wil- 4
derness, pe yaka yiem spouse killipi tum-
tum, pe mash klaska mesatchie ma-
mook.

Pe konaway klaska kopa Judea, pe 5
waght kopa Jerusalem, klaska cooley
kopa, yaka, pe klap baptize kopa river

Jordan, pe klaska yiem kopa klaska mesatchie mamook.

- 6 Pe John midlite passissie kopa camels tipsoo, pe yaka kow kopa skin lasanjel ; pe yaka muk-a-muk locusts pe honey.
- 7 Pe yaka hyas wawa, " alki ikt tyee chaku kyimta kopa nika, pe yaka elip skookum kopa nika, pe nika halo kloosh spose mash yaka shoes kopa yaka lapee.
- 8 Nawitka, nika baptize mesika kopa chuck, pe alki yaka baptize mesika kopa Holy Spirit."
- 9 Pe kopa okoak time Jesus chako mash kopa Nazareth, ikt town kopa Galilee, pe John baptized yaka kopa Jordan.
- 10 Pe yaka chako mash kopa chuck, pe yaka nanitch okoak sahalie chako halaktl, pe okoak Spirit, kakwa takope kilakila, chako keekwillie, pe midlite kopa yaka.
- 11 Pe wawa chako kopa sahalie ; " Mika, nika hyas tikke Tenass, Nika kloosh tum-tum kopa Mika."

Pe hyak okoak Spirit lolo yaka kopa 12 wilderness.

Pe yaka midlite kopa wilderness lakit 13 totlum sun, tempted kopa le joab ; pe yaka konamoxt masatchie komux, pe okoak angels kloosh nanitch yaka.

Alta klaska mash John kopa skookum 14 house, pe Jesus cooley kopa Galilee, yiem okoak kloosh wawa kopa Sahalie Tyee kingdom.

Pe yaka wawa, " Sahalie Tyee alta 15 chako, kloosh mesika kilapie tumtum, pe believe yaka kloosh wawa."

Pe yaka cooley wake siah kopa Galilee 16 lake, pe yaka nanitch Simon pe yaka ow Andrew, klaska mash net kopa chuck, kewa klaska fishermen.

Pe Jesus wawa kopa klaska, " chako 17 kyimta kopa nika, pe alki nika mamook mesika fishermen kopa tillicum."

Pe hyak klaska mash klaska net, pe 18 cooley kyimta kopa yaka.

Pe waght yaka cooley tenass siah, pe 19 yaka nanitch James, Zebedee tenass, pe

John yaka ow, midlite kopa klaska boat, mamook kloosh klaska nets ;

20 Pe yaka call klaska ; pe hyak klaska mash klaska papa, konamoxt okoak boat, pe okoak men klaxta mamook kopa klaska, pe cooley kyimta yaka.

21 Pe klaska cooley kopa Capernaum. Pe chako Sunday klaska cooley kopa Sunday-house, pe yiem.

22 Pe klaska kwah kopa yaka wawa, kewa yaka delate wawa, wake kakwa okoak scribes.

23 Pe midlite kopa okoak Sunday-house ikt man, yaka midlite tamanawus tum-tum, pe yaka hyas wawa.—

24 “ Jesus kloosh mika halo mamook ikta kopa nesika. Mika tike mamook memaloose nesika ? Nika kumtux klaxta mika ; kopa Saghalie Tyee mika chako.”

25 Pe Jesus wawa, “ kloosh mika kopet wawa, tamanawus, pe chako klahoney kopa yaka.”

Pe okoak tamanawus elip mamook 26
kokshut okoak man, pe hyas wawa, pe
alta yaka chako klahoney.

Pe konaway klaska kwah kopa ikta 27
klaska nanitch, pe klaska konamox
mamook tumtum kahta okoak chee
mamook, kewa yaka wawa kopa okoak
tamanawus, pe hya! klaska mamook
ikta yaka wawa.

Pe hyak okoak yiem cooley konaway 28
kah kopa Galilee.

Pe alta klask chako klahoney kopa 29
okoak Sunday house, pe klaska klatawa
kopa Simon pe Andrew klaska house,
konamox James pe John.

Pe yaka mamma Simon's klootchman 30
midlite sick kopa waum sick, pe klaska
hyak mamook kumtux Jesus.

Pe yaka chako iskim yaka lemah pe 31
mamook midwhit yaka, pe hyak okoak
waum sick klatawa, pe yaka kloosh
nanitch klaska.

Pe tenass polakilie, alta okoak sun 32
klatawa keekwillie, klaska lolo kopa

yaka konaway klaxta sick, pe klaxta midlite tamanawus.

- 33 Pe konaway tillicum kopa okoak town klaska midlite klahoney kopa okoak house.
- 34 Pe yaka mamook kloosh konaway klaxta sick kopa konaway huloima sick ; pe klaxta midlite tamanawus, pe halo yaka tikke okoak tamanawus spose wawa, kewa klaska kumtux yaka.
- 35 Pe elip chako sun yaka midwhit pe cooley kopa stick, pe yawa yaka pray.
- 36 Pe Simon, konamoxt yaka tillicum, klaska cooley kyimta kopa yaka.
- 37 Pe alta klaska klap yaka, pe klaska wawa kopa yaka, "konaway klaxta tikke mika."
- 38 Pe yaka wawa kopa klaska, "kloosh nesike cooley kopa huloima towns, spose nika waght yiem yahwa ; kewa nika chako kopa okoak illahe."
- 39 Pe yaka yiem kopa konaway Sunday-house kopa Galilee, pe yaka mash tamanawus.

Pe ikt leper chako kopa yaka, pe yaka 40
pray pe wawa kopa Jesus, " spose mika
tikke, mika skookum spose mamook
kloosh nika."

Pe Jesus delate sick tum-tum kopa 41
yaka, pe yaka mash yaka lemah kopa
okoak sick man, pe wawa, " nawitka
nika tikke, kloosh mika copet sick."

Pe alta yaka kopet wawa, pe hyak 42
okoak sick klatawa, pe okoak man
chako kloosh.

Pe Jesus wawa kopa yaka, " kloosh 43
halo mika mamook kumtux klaxta man
kahta mika chako kloosh.

Pe kloosh mika klatawa kopa laplet 44
mamook nanitch yaka, pe potlatch kopa
yaka ikta Moses wawa ankutte, spose
man chako kloosh kakwa mika."

Pe yaka cooley klahoney, pe hyak ya- 45
ka mamook kumtux konaway klaxta,
pe wake kahta Jesus waght cooley kopa
okoak town; pe yaka midlite kopa
wilderness, pe tillicum chako kopa kona-
way kah, pe cooley kopa yaka.

Chapter 2.

- 1 Pe waght Jesus klatawa kopa Capernaum, pe tillicum kumtax yaka midlite kopa house.
- 2 Pe klaska delate hiyu, wake kahta konaway klaska midlite kopa house. Pe yaka yiem kopa klaska.
- 3 Pe lakit man klaska lolo ikt sick man kopa yaka, konaway yake itlwillie memaloost.
- 4 Pe wake kahta klaska klap kah yaka midlite, kewa hiyu tillicum ; pe klaska kokshut okoak house kopa saghalie, pe klaska mash keekwillie okoak bed, kah midlite okoak sick man.
- 5 Jesus nanitch kahta klaska skookum tumtum, pe yaka wawa kopa okoak sick man, "Tenass, nika mash konaway mika tzeepie."
- 6 Pe scribes midlite yahwa, pe klaska mamook tumtum konamox.
- 7 "Ikta mamook okoak man peshak

wawa ; wake klaxta mash nesika me-
sahtchie, kopet Sahalie Tyee."

Pe Jesus hyak kumtux kahta klaska 8
mamook tumtum, pe yaka wawa kopa
klaska, " ikta mamook mesika mamook
tumtum kopa ikta nika wawa.

Kahta elip wake hyas kull, spouse 9
nika wawa kopa okoak sick, nika mash
mika tzeepie, or midwhit, iskim mika
bed pe cooley ?

Kloosh mesika kumtux, okoak Sag- 10
halie Tyee tenass midlite skookum kopa
okoak illahee, spouse mash tillicum
klaska mesatchie."

Kakwa yaka waght wahwa kopa 11
okoak sick, " kloosh mika midwhit,
iskim mika bed, pe klatawa kopa mika
house."

Pe hyak yaka midwhit, pe iskim yaka 12
bed, pe konaway klaska nanitch yaka
cooley pe klaska kwah, pe wawa mahcie
kopa Saghalie Tyee, " wake konsik
nesika nanitch kakwa."

Pe Jesus waght cooley wake siah kopa 13

lake, pe hiyu tillicum chako kopa yaka,
pe yaka yiem kopa klaska.

14 Pe yaka nanitch Levi, Alpheus yaka
tenas, yaka iskim taxes kopa tillicum,
pe Jesus wawa kopa yaka "chako
kyimta nika." Pe hyak yaka midwhit,
pe cooley kyimta yaka.

15 Pe alta Jesus iskim muck-a-muck
kopa Levi house, pe hiyu publicans pe
masat-chie tillicums konamoxt yaka,
pe yaka disciples ; kewa klaska hiyu, pe
klaska cooley kyimta kopa yaka.

16 Pe okoak Scribes pe Pharisees klaska
nanitch yaka muckamuck konamoxt
okoak publicans pe masatchie tillicum,
pe klaska wawa kopa yaka disciples,
"ikta mamook yaka konamoxt mucka-
muck kopa okoak publicans pe masat-
chie tillicums ?"

17 Pe Jesus kwahlan, pe wawa klaska,
"sick tillicums tikke doctor, wake
okoak skookum; nika chako sponse wawa
okoak masatchie tillicumskillipie klaska
tuntum, wake okoak kloosh tillicums."

John yaka disciples, pe okoak Phari- 18
sees ikt ikt sun halo iskim muckamuck ;
pe klaska chako wawa yaka, " ikta
mamook John yaka disciples pe okoak
Pharisees halo quansum iskim mucka-
muck, pe mika disciples quansum muck-
amuck."

Pe Jesus wawa kopa klaska, " kahta 19
spose halo muckamuck kah midlite chee
married. Kahta laylee midlite okoak
man chee married, wake kahta spouse
halo muckamuck.

Pe alki ikt sun okoak chee married 20
man klatawa, pe yahwa alki klaska halo
iskim muckamuck.

Wake kahta mamook sev chee sail 21
kopa old iktas, alki waght kokshut
okoat old iktas.

Pe halo klaxta mamook midlite chee 22
wine kopa old lipati, kewa hyak kokshut
okoak lipati, pe okoak wine yaka lost,
mamook midlite chee wine kopa chee
lipati."

Pe Jesus cooley kopa okoak sapolil 23

illahe kopa Sunday, pe yaka disciples
iskim okoak sapalil.

24 Pe okoak Pharisees wawa kopa yaka,
“ nanitch mika disciples kokshut okoak
law ?”

25 Pe Jesus wawa kopa klaska, “ halo
mesika kumtux ikta David mamook pe
yaka olo, pe okoak klaxta konamox
t yaka ?

26 Kahta yaka cooley kopa Sahalie tyee
house, kopa ankuttee Abiathar yaka
hyas laplet, pe yaka muckamuck okoak
shew-bread kopit laplet quansum muck-
amuck, pe yaka potlatch kopa okoak
yaka konamox t.”

27 Pe Jesus wawa kopa klaska, “ Sag-
halie Tyee halo mamook man spose
kloosh kopa Sunday, yaka mamook
Sunday spose kloosh kopa man.”

28 Pe waght Saghalie Tyee tenass yaka
tyee kopa Sunday.”

Chapter 3.

Pe Jesus waght cooley kopa Sunday- 1
house, pe midlite yawa ikt man, mema-
loost yaka lemah.

Pe klaska watch spouse alka Jesus 2
mamook kloosh yaka leemah, pe alki
klaska mash yaka kopa skookum house,
kewa Sunday okoak sun.

Pe Jesus wawa kopa okoak man, 3
memaloost yaka lemah, "kloosh mika
midwhit."

Pe Jesus wawa kopa konaway klaska, 4
"kahta okoak law spouse mamook
kloosh mamook kopa Sunday, or spouse
mamook mesatchie? Spouse potlatch
life kopa tillicum, or spouse mamook me-
maloose?" Pe klaska halo wawa ikta.

Pe Jesus chako solex, pe yaka sick 5
tumtum kewa klaska kull tumtum, pe
yaka wawa kopa okoak man, "mamook
saghalie mika lemah"; pe yaka ma-
mook saghalie yaka lemah, pe hyak
yaka chako kloosh.

- 6 Pe okoak Pharisees klatawa klahoney,
pe klaska mamook tumtum konamoxt
okoak Herodians, spose mamook me-
moloose yaka.
- 7 Pe Jesus mamook haul yaka disciples
pe klatawa kopa lake, pe delate hiyu
tillicums kopa Galilee cooley kyimta
yaka.
- 8 Pe kopa Judea, pe Jerusalem, pe
Idumea, pe inati Jordan, pe klaska
kopa Tyre pe Sidon, delate hiyu, klaska
kwalam kahta yaka hyas mamook, pe
klaska chako kopa yaka.
- 9 Pe yaka wawa kopa yaka disciples
klosh iskim boat, kewa okoak tillicum
delate hiyu.
- 10 Kewa konaway klaxta midlite ikta
sick, kakwa klaska tikke klap
yaka.
- 11 Pe klaxta midlite mesatchie tamana-
wus, alta klaska nanitch yaka, hyak
klaska klatawa whim, pe klaska wawa,
“mika Saghalie Tyee tenass.”
- 12 Pe Jesus wawa kopa klaska, klosh

halo mesika mamook kumtux klaxta kopa nika."

Pe yaka klatawa kopa mountain, pe 13 yaka call klaxta yaka tikke, pe klaska cooley kopa yaka.

Pe yaka mamook laplet kopa totlum 14 pe moxt, sponse alki klaska konamoxt yaka, pe klata yiem ka yake mash klaska.

Pe midlite skookum kopa klaska 15 sponse mamook klosk kopa sick pe mash klahoney okoak tamanawus.

Pe Simon yaka potlatch name Peter. 16

Pe James, Zebedee yaka tenass, pe 17 John, okoak James yaka ow; yaka potlatch klaska name Boanarges.

Pe Andrew, pe Philip, pe Bartholomew, pe Matthew, pe Thomas, pe James, Alpheus yaka tenass, pe Thaddeus, pe Simon okoak Canaanite.

Pe Judas Iscariot, klaxta mamook 19 mesatchie kopa yaka.

Pe klaska cooley kopa ikt house; 20 pe waght okoak hiyu tillicum klap

yaka, pe wake kahta klaska mucka-muck.

- 21 Pe yaka tillicum kumtux kah yaka midlite, pe klaska chako iskim yaka, kewa klaska wawa yaka chako pelton.
- 22 Pe okoak Scribes chako kopa Jerusalem, klaska wawa, midlite Beelzebub kopa yaka, pe kopa lejoab, yaka mash klahoney tamanawus.
- 23 Pe yaka call klaska pe yaka wawa, "kahta alki lejoab mash klahoney lejoab?"
- 24 Pe spouse okoak tillicum kopa ikt illahee konamoxt fight wake kahta klaska skookum!
- 25 Pe spouse okoak tillicum kopa ikt house halo konamoxt tumtum, wake kahta klaska kloosh.
- 26 Pe spouse lejoab konamoxt solex kopa lejoab wake kahta yaka skookum; alki yaka kopet.
- 27 Wake kahta klaxta klatawa kopa skookum man, yaka house, pe mamook mesatchie yaka iktas, kopet spouse alki

yaka elip kow okoak skookum man,
yawa alki yaka mamook mes "chie yaka
house.

Delate nika wawa kopa mesika ; alki 28
saghalie tyee mamook klahowya kopa
konaway klaxta mesatchie, pe klaxta
mestachie wawa kopa yaka.

Pe klaxta mestachie wawa kopa Holy 29
Spirit, wake konsick alki Saghalie Tyee
mamook klahowya kopa yaka, kewa
elip mesatchie ikta yaka wawa."

Kewa klaska wawa, " midlite me- 30
satchie tumtum kopa yaka."

Pe hiyu tillicum midlite wake siah 31
kopa yaka, pe klaska wawa kopa yaka.

" Nanitch mika mamma, pe mika ow 32
tikke klap mika."

Pe Jesus wawa kopa klaska, " klaxta 33
nika mamma, pe klaxta nika ow ?"

Pe yaka nanitch okoak tillicum wake 34
siah kopa yaka, pe yaka wawa, " okoak
nika mamma, pe okoak nika ow.

Kewa klaxta mamook ikta S. 35
Tyee tikke, yaka nika ow, pe yaka nika
mamma. '

Chapter 4.

- 1 Pe waght Jesus yiem wake siah kopa chack, pe hiyu tillicum cooley kah yaka midnite, pe yaka klatawa midlite kopa boat, pe okoak boat tenass siah kopa illahe, pe konaway tillicum midlite kopa illahee.
- 2 Pe yaka yiem kopa klaska, pe yaka wawa ;
- 3 " Kloosh mesika kumtux ; ikt man klatawa mash seed kopa illahee.
- 4 Pe kah yaka mash okoak seed, ikt-ikt klap kopa wayhut, pe kilakila chako muc'amuck yaka.
- 5 Pe ikt-ikt klap kopa stone illahee kah halo keekwillie illahee, pe hyak yaka chako hyas, kewa yaka halo keekwillie illahee.
- 6 Pe alta okoak sun chako skookum, pe mamook memaloose yaka, kewa halo keekwillie yaka lapeah.
- 7 Pe ikt-ikt klap kopa needle stick

illahee, pe needle stick tolo yaka pe
wake kahta yaka chako kloosh ;

Pe ikt-ikt klap kloosh illahee, pe yaka 8
chako kloosh, pe tolo hiyu seed, some
klone totlum, some tahum totlum, pe
some ikt hundred."

Pe Jesus wawa kopa klaska, " klaxta 9
midlite kwahlan, kloosh yaka kwahlan,
"ta nika wawa."

Pe alta okoak hiyu tillicum klatawa, 10
pe yaka disciples tikke kumtux ikta
okoak yaka chee wawa.

Pe Jesus wawa kopa klaska, " alki 11
mesika kumtux okoak kull ikta kopa
Saghalie Tyee, pe klaxta midlite kla-
honey, hyas kull spose klaska kumtux.

Klaska kakwa nanitch pe halo klaska 12
nanitch, klaska kwahlan pe halo klaska
kumtux ; kakwa klaska halo killipie
tumtum, pe mash klaska mesatchie."

Pe yaka wawa kopa klaska, " spose 13
mesika halo kumtux okoak wawa,
kahta alki mesika kumtux konaway
nika wawa.

- 14 Saghalie Tyee wawa kakwa seed.
- 15 Pe klaxta midlite wayhut tumtum, hyak lejoab chako iskim okoak seed, spouse klap kopa klaska tumtum.
- 16 Pe klaxta midlite tumtum kakwa stone illahee, chee klaska klap okoak, klosh wawa, pe klaska klosh tumtum.
- 17 Pe okoak wawa halo klatawa keek-willie kopa klaska tumtum, pe spouse klaska klap sick, or klap kull kopa Saghalie Tyee wawa, hyak klaska sick tumtum.
- 18 Pe klaxta midlite tumtum kakwa needle stick, spouse okoak wawa klap klaska tumtum.
- 19 Hyak okoak tseepie mamook, pe okoak olo kopa chickamin, pe huloima ikta, mamook memaloose okoak klosh wawa.
- 20 Pe klaxta midlite tumtum kakwa kloosh illahee; spouse klaska kwalan okoak wawa, pe mamook midlite kopa klaska tumtum; hyak yaka chako kloosh, pe mamook killapie seed, seme

klone totlum some taghum totlum, pe
some ikt hundred."

Pe Jesus wawa kopa klaska, "wake 21
kahta mesika mash candle keekwillie
kopa box, or keekwillie kopa bed ;
mesika mamook saghalie kopa latab ?

Wake kahta spouse ipsoot kopa ikta. 22
Alki yaka klahoney konaway okoak
ipsoot.

Spouse klaxta midlite kwolahn tikke 23
kumtux, klosh yaka kumtux."

Pe Jesus wawa kopa klaska, "klosh 24
nanitch ikta mesika kwolahn ! Kahta
mesika mamook itlan, alki waght me-
sika klap kakwa ; pe klaxta kwolahn
alki yaka klap waght hiyu.

Klaxta midlite ikta alki waght yaka 25
klap ; pe klaxta halo midlite ikta alki
yaka lost kanaway."

Pe yaka wawa, "kakwa okoak Sag- 26
halie Tyee mamook, spouse klaxta man
mash seed kopa illahee.

Pe yaka sleep, pe waght midwit 27
polakilly pe sun, pe okoak seed

chako saghalie, halo yaka kumtux kahta.

28 Kewa okoak illahee mamook chako ikt kopā yaka tumtum; elip tenass tipso, kimta latet, pe alta okoak latet pahlt kopā klosk sapolel.

29 Pe alta okoak sapolel chako fire, hyak okoak man mamook cut kopā yaka knife."

30 Pe yaka wawa, "kahta okoak Saghalie Tyee mamook kopā okoak illahee?

31 Kakwa ikt tenass mustard seed, spose klaxta mash kopā illahee, yaka elip tenass kopā kanaway seed.

32 Pe alta yaka chako hyas, pe yaka elip hyas kopā kanaway tipso, hiyu yaka lemah; pe okoak tenass kilakila chako midlite kopā yaka lemah spose sleep."

33 Pe kopā hiyu kakwa yiem yaka wawa kopā klaska, kahta wake chako till klaska kwolan.

34 Pe alta kanaway tillicum klataway, pe yaka mamook kumtux yaka disciples kanaway okoak yiem.

Pe chako tenass polakilie yaka wawa 35
kopa klaska, "kloosh nesika klatawa
inati."

Pe klaska lolo yaka kopa ship, pe 36
waght midlite ikt-ikt tenass boat.

Pe chako skookum, wind, pe okoak 37
chuck clap kopa ship pe mamook pahtl
waka.

Pe Jesus midlite kopa oputs, pe yaka 38
sleep ; pe klaska mamook get up yaka,
pe klaska wawa "Tyee halo mika tum-
tum kopa alki nesika memaloose."

Pe yaka midwit, pe mamook kapit 39
okoak wind, pe yaka wawa kopa okoak
mesatchie chuck, "kloosh kapit." Pe
okoak wind kapit, pe delate chako
kloosh okoak chuck.

Pe yaka wawa kopa klaska, "ikta 40
mamook mesika kwass ? ikta wake me-
sika skookum tumtum ?"

Pe klaska chako kwass pe konamox 41
wawa, "kahta huloima okoak man
kewa okoak wind pe okoak chuck hyak
mamook ikta yaka wawa ?"

Chapter 5.

- 1 Pe klaska klap kopa inati, kopa okcak Gadarenes klaska illahe.
- 2 Pe alta yaka klatawa kopa illahe pe ikt tamanawus man klap yaka.
- 3 Pe okoak man kwansum midlite kah memaloose tillicum, pe wake kahta klaxta mamook kow yaka, kultus spose chain.
- 4 Kwansum yaka kokshut okoak chains pe okoak skookum chickamin spose kow yaka ; pe wake klaxta tolo yaka.
- 5 Pe kwansum, polakilie pe sun, yaka cooley kopa mountain pe kopa memaloose illahe, hyas yaka wawa, pe mamook kokshut yaka skin kopa stone.
- 6 Pe yaka nanitch Jesus kopa siah, pe yaka hyak cooley kopa yaka, pe pray kopa yaka.
- 7 Pe yaka hyas wawa, " ikta nika mamook kopa mika, Jesus, mika tenass kopa okoak hyas Saghalie Tyee ? Nika

wawa mika kopa Saghalie Tyee, kloosh halo mika mamook ikta kopa nika."

Pe Jesus wawa kopa yaka, "kloosh 8 mika chako klahoney kopa okoak man, mika masatchie tamanawus."

Pe Jesus wawa, "klaxta mika 9 name?" Pe yaka wawa, "nika name Legion; kewa nesika hiyu."

Pe okoak tamanawus wawa kopa 10 Jesus, "kloosh halo mika mash nesika kopa siah."

Midlite tenass siah hiyu kushoo, pe 11 klaska mukamuk.

Pe kanaway okoak tamanawus wawa 12 kopa Jesus, "kloosh mash nesika kopa okoak kushoo."

Pe Jesus wawa klaska, "kloosh." 13 Pe kanaway okoak mesatchie tamanawus mash okoak man, pe klatawa kopa okoak kushoo, pe okoak kushoo delate kooley kopa chuck, pe klaska mimaloose (kakwa moxt thousand).

Pe klaxta kloosh nanitch okoak ku- 14 shoo klaskø hako kwass, pe klaska

cooley kopa town, pe mamook kumtux kanaway klaxta, pe klaska cooley nanitch spose delate okoak wawa.

15 Pe klaska klap Jesus, pe klaska nanitch okoak ankutte pahtl kopa mesatchie tamanawus, pe yaka midlite iktas, pe chako kloosh yaka tumtum, pe klaska kwass.

16 Pe klaxta nanitch ikta Jesus mamook, klaska mamook kumtux okoak tillicum ikta klaska nanitch kopa okoak man, pe kopa okoak kushoo.

17 Pe klaska wawa kopa Jesus spose yaka klatawa mash klaska illahe.

18 Pe alta yaka klap kopa ship, okoak ankutte tamanawus hyas tikke konamoxt yaka.

19 Pe Jesus halo tikke, pe yaka wawa kopa okoak man, "kloosh mika klatawa kopa mika house, pe kopa mika tillicum, pe mamook kumtux klaska kahta hyas ikta Saghalie Tyee mamook kopa mika, pe kahta yaka mamook klahowya kopa mika."

Pe yaka klatawa kopa Decapolis, pe 20
mamook yiem kahta Jesus mamook
kopa yaka, pe konaway tillicum kwah.

Pe alta Jesus ko kopa inati, pe hiyu 21
tillicum chako kopa yaka, pe yaka
midlite wake siah kopa chuck.

Pe ikt tyee kopa Sunday-house chako 22
kopa yaka, Jairus yaka name, pe yaka
whim kopa Jesus lapee.

Pe yaka wawa kopa Jesus, " nika 23
tenass klootchman wake siah mema-
loose, kloosh mika chako mamook mid-
lite mika leemah kopa yaka, pe alki
yaka chako kloosh, wake alki yaka
memaloose."

Pe Jesus cooley konamoxt yaka ; pe 24
hiyu tillicum cooley kyimta kopa yaka,
pe mamook kwutl yaka.

Pe ikt klootchman midlite sick kopa 25
totlum pe moxt cold.

Pe yaka klap kul mamook kopa hiyu 26
doctor, pe alta kopet yaka chickamin,
pe halo yaka chako kloosh ; yaka chako
more sick.

- 27 Pe yaka hear kopa Jesus, pe yaka chako kymta kopa yaka, pe yaka tenass iskim Jesus yaka coat.
- 28 Kewa yaka wawa, "spose nika tenass iskim yaka iktas, alki nika chako kloosh."
- 29 Pe hyak yaka sick chako dry, pe yaka kumtux alta yaka kloosh.
- 30 Pe Jesus waght kumtux kakwa spouse ikta klattawa klahoney kopa yaka, pe yaka killapie seahose pe wawa, "klaxta iskim nika iktas?"
- 31 Pe yaka disciples wawa kopa yaka, "mika nanitch kahta hiyu tillicum mamook kwutl mika, pe mika wawa klaxta kwutl nika?"
- 32 Pe yaka nanitch spouse kah midlite okoak klaxta iskim yaka iktas.
- 33 Pe okoak klootchman chako kwass, pe yaka whim kopa Jesus seahose pe mamook kumtux Jesus ikta yaka mamook.
- 34 Pe Jesus wawa kopa yaka; "tenas, mika skookum tumtum, kakwa mika

kopet sick, kloosh mika kopet kwass
pe mika cooley, alta mika chako
kloosh."

Jesus halo alta kopet wawa, petillicum 35
chako klahoney kopa okoak Sunday-
house tyee yaka house, pe klaska wawa,
"mika tenass alta memaloose, kloosh
mika kopet haul okoak tyee."

Pe alta Jesus hear ikta klaska wawa, 36
pe yaka wawa kopa okoak Sunday-
house tyee, "Halo mika kwass, kloosh
mika skookum tumtum."

Pe Jesus halo tikke klaxta konamox 37
yaka, kopet Peter, pe James, pe John,
James yaka ow.

Pe Jesus kokopa house okoak Sunday- 38
house tyee, pe yaka nanitch kahta hiyu
tillicum, pe kahta klaska hiyu cry.

Pe alto yaka cooley inside, pe yaka 39
wawa, "ikta mamook mesika hiyn cry ?
Okoak tenass klootchman halo mema-
loose, kopet yaka sleep."

Pe klaska hyas heehe kopa yaka. Pe 40
yaka mash kanaway klaska klahoney,

kopet okoak papa pe mamma, pe okoak yaka konamox, pe cooley kah midlite okoak tenass klootchman.

41 Pe Jesus iskim okoak tenass klootchman yaka leemah, pe wawa kopa yaka, "Talitha cumi,—tenass klootchman kloosh mika midwit."

42 Pe hyak okoak tenass klootchman midwit, pe cooley, kewa yaka totlum pe moxt co. 1. Pe klask kwah kopa hyas kwah.

43 Pe Jesus wawa, "kloosh halo mesika mamook kumtux klaxta; pe kloosh mesika potlatch yaka muckamuck."

Chapter 6.

1 Pe yaka cooley klahoney kopa yawa, pe chako kopa yaka illahee; pe yaka disciples cooley kyimta yaka.

2 Pe alta chako Sunday, pe yaka klataway yiem kopa Sunday-house; pe hiyu klaxta hear yaka, pe klaska kwah pe wawa, "kah yaka klap okoak? pe

klaxta mamook kumtux yaka okoak
hyas kull, kahta yaka mamook hyas
ikta kopa yaka lemah ?

Wake yaka okoak carpenter, tenass 3
kopa Mary, ow kopa James, pe Joses pe
Judas pe Simon ? pe okoak klootchman
yaka ow klaska waght konamoxt ne-
sika." Pe klaska chako solex kopa
yaka.

Pe Jesus wawa kopa klaska, "spose 4
laplet midlite kopa huloima illahe, pe
tillicum kloosh nanitch yaka; pe wake
kakwa sposse yaka midlite kopa yaka
illahe, konamoxt yaka tillicum. midlite
kopa yaka house."

Pe wake kahta yaka mamook 5
hyas ikta yawa, kapit kopa wake
hiyu sick tillicum, yaka mash yaka
lemah kopa klaska, pe mamook kloosh
klaska.

Pe yaka kwah kopa klaska tseepee 6
tumtum. Pe yaka cooley yiem kopa
konaway kah klaska illahe.

Pe yaka call okoak totlum pe moxt 7

pe mash klaska moxt-moxt; pe pot-latch klaska skookum kopa masatchie tamanawus.

- 8 Pe yaka halo tikke sponse klaska lolo ikta, kapit cooley stick; halo iktas, halo sapolil, pe halo chickamin.
- 9 Kopet stick shoes kopa klaska lapee, pe halo moxt coat kopa ikt man.
- 10 Pe yaka wawa kopa klaska, sponse mesika klap kopa ikt illahee, kloosh mesika midlite kopa ikt house, pe halo mash, kopet sponse cooley kopa huloima illahee.
- 11 Pe klaxta halo tikke mesika, pe halo iskim ikta mesika wawa; sponse mesika klatawa klosh mesika mash okoak illahee midlite mesika lapee, witness kopa klaska. Nika delate wawa kopa mesika alki elip wake kull kopa Sodom pe Gomorrah sponse hyas judgement.
- 12 Pe klaska cooley klahoney, pe yiem sponse tillicum killapie tumtum.
- 13 Pe klaska mash hiyu mesatchie tamanawus, pe mamook lamachin kopa

glease klaxta sick, pe marnook kloosh klaska.

Pe king Herod kumtux kopa yaka, pe 14 yaka wawa John the Baptist midwhit kopa kah yaka memaloose, kakwa de-late skookum ikta yaka mamook.

Huloima tillicum wawa Elias; pe 15 waght huloima tillicum wawa, kakwa spouse ankutte prophet chako killapie.

Pe alta Herod yaka kumtux, pe yaka 16 wawa, nawitka John okoak, klaxta nika mash latet; yaka waght midwhit kopa kah yaka memaloose.

Nawitka Herod mamook kow John 17 pe mash kopa skookum house, kewa Herodias tikke, klootchman kopa yaka ow, Philip; kewa Herod married kopa yaka.

Pe John wawa kopa Herod, halo ka- 18 kwa kopa law spouse mika iskim mika ow yaka klootchman.

Kakwa Herodias solex kopa John, 19 tikke mamook memaloose yaka, pe wake kahta;

- 20 Kewa Herod quass kopa John, yaka kumtux yaka kloosh man, pe kloosh nanitch yaka; pe ikta yaka wawa, yaka kloosh tumtum, pe mamook hiyu ikta.
- 21 Pe okoak sun kah Herod born, yaka potlatch mukamuk kopa hyas tyees, pe hyas captains, pe haloima tyees kopa Galilee;
- 22 Pe alta Herodias' tenass klootchman cooley kah klaska midlite, pe danced, pe mamook kloosh tumtum kopa Herod, konamoxt konaway tyee, pe king wawa kopa okoak tenass klootchman, "klosh mika wawa ikta mika tikke pe alki nika potlatch mika."
- 23 Pe yaka sware, "ikta mika tikke alki nika potlatch mika, kopa sitkum nika illahe."
- 24 Pe yaka klattawa wawa kopa yaka mamma, "ikta alki nika ask?" Pe yaka wawa, "John the Baptist's latet."
- 25 Pe yaka killapie hyak kopa king pe wawa yaka, "nika tikke spouse mika

potlatch nika alki, Jehn the Baptist
yaka latet."

Pe okoak king klap delate sick tum- 26
tum ; pe wake kahta yaka kilapie ikta
yaka wawa, kewa yaka shame kopa
konaway okoak tyee.

Pe hyak okoak king mash ikt man 27
kopa skookum house, pe yaka mash
yaka latet.

Pe yaka lolo yaka latet pe potlatch 28
kopa okoak tenas klootchman ; pe okoak
tenas klootchman potlatch kopa yaka
mamma.

Pe yaka disciples kumtux okoak pe 29
klaska iskim yaka itlwillie pe mash kah
memaloose tillicum.

Pe okoak apostles konamoxt cooley, 30
kopa Jesus, pe mamook kumtux yaka
konaway ikta klaska mamook pe waght
ikta klaska yiem.

Pe yaka wawa kopa klaska, kloosh 31
mesika chako tenas siah kah halo tilli-
cum, pe kopet mamook tenas laylee,
kewa kwansum hiyu tillicum chako

kopa klaska, pe wake kahta klap muk-amuk.

32 Pe klaska klatawa kopa boat, pe cooley kah halo tillicum.

33 Pe okoak tillicum nanitch klaska klatawa pe hiyu klaska kumtux kah alki yaka cooley, pe klaska hyak cooley kopa lapee, pe klaska elip ko kah alki yaka midlite.

34 Pe Jesus, alta yaka ko kopa illa-hee, pe yaka nanitch hiyu tillicum, pe yaka sick tumtum kopa klaska, kewa klaska kakwa lamoto spouse halo klaxta kloosh nanitch, pe yaka waght yiem kopa klaska.

35 Pe alta wake siah polakalie, pe yaka disciples chako kopa yaka, pe wawa, "halo ikta midlite kopa okoak illahee, pe alta wake siah polakalie.

36 Klosh mika mash okoak tillicums, pe wawa klaska spouse klatawa kah house midlite, pe makook sapolil ; kewa halo ikta klaska mukamuk."

37 Yaka wawa kopa klaska, "klosh me-

sika potlatch klaska mukamuk." Pe klaska wawa kopa yaka, "mika tikke spouse nesika cooley makook moxt hundred penny kopa sapolil pe potlatch klaska mukamuk?"

Yaka wawa kopa klaska, "konsik me- 38 sika sapolil? Klatawa nanitch." Pe alta klaska kumtux klaska wawa, "kwinnun, pe moxt fishes."

Pe yaka mamook midlite konaway 39 klaska kopa pechugh tipso.

Pe ikt-ikt midlite kwinnun totlum, 40 pe ikt-ikt midlite hundred.

Pe alta yaka iskim okoak kwinnun 41 sapolil pe okoak moxt fishes, pe yaka nanitch kopa saghalie, pe yaka bless okoak sapolil, pe mamook kokshut, pe potlatch kopa yaka disciples, spouse lolo kopa klaska; pe okoak moxt fishes waght yaka kokshut pe potlatch kopa konaway klaska.

Pe konaway klaska mukamuk, pe 42 chako pahtl.

Pe klaska iskim totlum pe moxt 43

basket kopa okoak kokshut sapolil pe fish.

44 Kakwa kwinnun thousand man, klaxta mukamuk kopa okoak sapolil.

45 Pe alta yaka wawa yaka disciples spouse klaska cooley kopa boat, pe klatawa inati kopa Bethsaida.

46 Pe alta yaka kopet mash okoak hiyu tillicum, pe yaka klatawa kopa mountain spouse pray.

47 Pe alta chako polakalie, pe okoak boat midlite sitkum kopa chuck, pe Jesus midlite kopa illahee.

48 Pe yaka nanitch klaska mamook skookum issik ; kewa okoak wind mesatchie kopa klaska ; pe kakwa lakit watch kopa polakilie yaka chako kopa klaska, cooley saghalie kopa chuck, pe kakwa spouse alki klattawa inati kopa klaska.

49 Pe alta klaska nanitch yaka cooley saghalie kopa chuck, klaska tumtum tamanawus, pe klaska hyas wawa ;

50 Kewa konaway klaska nanitch yaka,

pe klaska kwass. Pe hyak yaka wawa kopa klaska, "kloosh mesika skookum tumtum ; nika ; wake mesika kwass."

Pe yaka klatawa kopa klaska boat, 51
pe okoak wind kopet ; pe klaska delate kwah kopa klaska tumtum.

Kewa klaska mash tumtum kopa 52
okoak hyas mukamuk ; pe klaska tumtum chako kull.

Pe alta klaska ko inati kopa Gen- 53
nesaret illahe.

Pe alta klaska klatawa kopa illahe, 54
pe hyak klaska kumtux yaka.

Pe hyak klaska cooley kopa konaway 55
okoak illahe, pe klaska lolo okoak sick tillicum midlite kopa bed, kah yaka midlite.

Pe konaway kah yaka cooley, kopa 56
tenas town, kopa hyas town, pe kah halo town, klaska lolo okoak sick tilli-
cum, pe mamook midlite kopa wayhut,
spose yaka mamook klahowyum klaska ;
pe konaway klaxta iskim yaka passisie,
hyak klaska chako kloosh.

Chapter 7.

- 1 Pe alta chako kopa yaka okoak Pharisees, pe ikt-ikt okoak Scribes, klaska chako kopa Jerusalem.
- 2 Pe klaska nanitch ikt-ikt yaka disciples mukamuk sapolil pe halo klaska elip wash klaska lemah, pe klaska wawa, "halo kloosh."
- 3 Kewa okoak Pharisees, pe konaway okoak Jews, spose halo klaska quansum wash, wake kahta mukamuk, kakwa okoak ankutte tillicum wawa.
- 4 Pe spose klaska chako killapie kopa makook house, wake kahta klaska mukamuk, spose halo elip wash. Pe hiyu huloima ikta klaska kloosh nanitch, mamook wash kopa lapot, pe kettle, pe latab.
- 5 Pe okoak Pharisees pe Scribes klaska ask yaka, "ikta mamook mika disciples halo cooley kakwa okoak old tillic m wawa, kewa klaska mukamuk pe halo elip wash klaska lemah?"

Yaka killapie wawa kopa klaska, 6
“ Esaias delate wawa kopa mesika
klininawhit, okoak tillicum kloosh
wawa kopa nika kopa klaska laboosh,
pe klaska tumtum siah kopa nika.

Pe dilate kultus wawa kahta klaska 7
pray kopa nika, pe klaska yiem kopa
man yaka law.

Kewa mesika ipsoot ikta Saghalie 8
Tyee wawa pe mesika mamook saghalie
ikta man wawa kopa mamook wash
lapot, pe kettle, pe hiyu huloima ikta
mesika mamook.”

Pe yaka wawa kopa klaska, “ delate 9
mesika elip tikke ikta man wawa, pe me-
sika mash siah ikta Saghalie Tyee wawa.

Kewa Moses wawa, kloosh nanitch 10
mika papa pe mika mamma ; pe klaxta
mesatchie wawa kopa yaka papa or
yaka mamma klash yaka memaloose.

Pe mesika wawa spouse klaxta man 11
kultus wawa kopa yaka papa or yaka
mamma,

Pe wake mesika tikke spouse yaka 12

waght mamook ikta kopa yaka papa or yaka mamma.

- 13 Mesika mamook wake skookum okoak saghalie tyee wawa kopa okoak old tillicum wawa ; pe hiyu kakwa ikta mesika mamook."
- 14 Pe alta yaka call konaway okoak tillicum kopa yaka, pe yaka wawa kopa klaska, " open mesika kwalan, pe klosk mesika kumtux, konaway mesika.
- 15 Okoak ikta klahoney spouse ko kopa man wake kahta mamook mesatchie yaka ; pe okoak ikta chako klahoney kopa yaka, okoak mamook mesatchie yaka.
- 16 Spouse klaxta man tikke kumtux kopa yaka kwalan, klosk yaka kumtux."
- 17 Pe alta klaska ko kopa house, pe yaka disciples ask yaka kopa okoak kull wawa.
- 18 Pe yaka wawa kopa klaska, " ikta mamook mesika halo kumtux ? Mesika halo nanitch ikta ko kopa man wake kahta mamook mesatchie yaka ;

Kewa yaka halo ko kopa tumtum, pe 19
yaka ko kopa kwatin ; pe waght yaka
mash klahoney kopa oputs ?”

Pe yaka wawa, “ okoak ikta chako 20
klahoney kopa man, okoak mamook
mesatchie yaka.

Kewa kopa yaka tumtum chako 21
klahoney konaway mesatchie tumtum,
mesatchie mamook, memaloose,

Kapswalla, tseepie, moxt tumtum, 22
mesatchie eye, mesatchie laboosh,
youtl, pelton.

Konaway okoak mesatchie ikta chako 23
klahoney kopa man, pe mamook me-
satchie yaka.”

Pe alta yaka midwhit pe cooley kopa 24
wake siah Tyre pe Sidon, pe yaka ko
kopa ikt house, pe yaka wake tikke
spose klaxta kumtux ; pe wake kahta
yaka ipsoot.

Kewa ikt klootchman, yaka tenas 25
midlite masatchie tamanawus pe yaka
kwalan kopa yaka, pe yaka chako
whim kopa yaka lapee.

- 26 Pe okoak klootchman yaka Greek kopa Syrophénicia, pe yaka tikke spouse Jesus mash okoak masatchie tamanawus klahoney kopa yaka tenas.
- 27 Pe Jesus wawa kopa yaka, “kloshe okoak tenases elip mukamuk; kewa wake kloshe spouse iskim okoak tenases klaska sapolil pe potlatch kopa kamux.”
- 28 Pe yaka kilapie wawa kopa yaka, “nawitka tye, pe okoak kamux (keekwillia kopa latá) klaska mukamuk kopa okoak tenases kokshut sapolil.”
- 29 Pe Jesus wawa kopa yaka, “kewa mika wawa kakwa, kloshe mika klatawa; alta okoak masatchie tamanawus klatawa klahoney kopa mika tenas.”
- 30 Pe alta yaka ko kopa yaka house pe yaka nanitch, nawitka, okoak mesatchie temanawus klatawa klahoney kopa yaka tenas, pe yaka tenas midlite kopa bed.
- 31 Waght yaka mash Tyre pe Sidon, pe yaka ko kopa Galilee Lake, sitkum kopa Decapolis.

Pe klaska lolo kopa yaka, ikt man, 32
memaloose yaka kwolahn, pe waght
yaka lalong halo delate; pe klaska
tikke spouse Jesus mamook klahowyum
yaka.

Pe Jesus lolo ka halo tillicum, pe mash 33
yaka lemah kopa yaka kwolahn, pe
yaka mamook toh, pe mash kopa yaka
lalong.

Pe yaka nanitch kopa saghalie pe 34
wawa, "Eph-pha-tha, klosk halaktl."

Pe hyak yaka kwolahn halaktl, pe 35
ya'-- lalong chako stoh, pe yaka wawa
chako delate.

Pe Jesus wake tikke spouse klaxta 36
kumtux, pe klaska mamook kumtux
kanaway klaxta.

Pe klaska delate kwah, pe klaska 37
wawa, "nawitka, delete klosk konaway
ikta yaka mamook, okoak memaloose
kwolahn alta kumtux; pe okoak mem-
loose lalong alta wawa."

Chapter 8.

- 1 Delate hiyu tillicum cooley kah Jesus midlite, pe yaka wawa kopa yaka disciples.
- 2 " Nika sick tumtum kopa okoak tillicum, kewa klaska konamoxt nika alta klone sun, pe halo klaska mukamuk.
- 3 Pe spouse nika halo potlatch klaska mukamuk alki klaska klap sick kopa wayhut; kewa ikt-ikt chako kopa siah."
- 4 Pe yaka disciples killapie wawa, "kah alki nesika kla mukamuk spouse mamook pahtl konaway okoak tillicum?"
- 5 Pe Jesus wawa klaska, " konsik sepolil midlite kopa mesika?" Pe klaska wawa, " sinamoxt."
- 6 Pe yaka wawa spouse okoak tillicum midlite kopa illahe; pe yaka iskim okoak sinamoxt sapolil, pe wawa mahsie, pe kokshut, pe potlatch kopa yaka disciples spouse lolo kopa tillicum; pe klaska mamook kakwa.
- 7 Pe klaska midlite wake hiyu tenas,

fishes, pe yaka waght bless okoak, pe wawa spouse potlatch kopa klaska.

Pe konaway klaska mukamuk, pe 8 chako pahtl, pe alta kopet klaska mukamuk, pe klaska iskim sinamoxt basket pahtl kopa kokshut mukamuk.

Pe kakwa lakit thousand tillicum 9 iskim mukamuk; pe alta yaka wawa spouse klaska klatawa.

Pe hyak yaka klatawa kopa boat 10 konamoxt yaka disciples, pe klaska ko kopa Dalmanutha.

Pe okoak Pharisees chako, pe klaska 11 hiyu wawa kopa yaka, tikke kumtux klaxta potlatch yaka skookum.

Pe yaka sick tumtum, pe wawa, 12 "ikta mamook mesika tikke kumtux klaxta potlatch nika skookum? Nika delate wawa kopa mesika, wake alki mesika klap kumtux."

Pe yaka mash klaska, pe cooley kopa 13 boat, pe klatawa inati.

Pe okoak disciples klaska mash tum- 14

tum spouse iskim sapolil; pe kopet ik sapolil midlite kopa boat.

15 Pe Jesus wawa kopa klaska, "klose nanitch okoak lamachin sapolil kopa Pharisees, pe kopa Herod."

16 Pe klaska mamook tumtum konamoxt ikta yaka wawa kopa okoak lamichin sapolil.

17 Pe Jesus wawa kopa klaska, "ikta mamook mesika hiyu tumtum kewa mesika halo sapolil? Nawitka mesika halo kumtux? Nawitka chako kull mesika tumtum?"

18 Nawitka mesika halo nanitch kopa mesika eye? Pe, nawitka mesika halo hear kopa mesika kwalahn? Pe nawitka mesika mash tumtum.

19 Kahta nika kokshut okoak kwinim sapolil kopa okoak kwinim thousand, konsik basket kopa okoak kokshut sapolil mesika iskim?" Klaska wawa kopa yaka, "totlum pe moxt."

20 "Pe okoak sinamoxt sapolil kopa lakit thousand, konsik basket kopa

kokshut sapolil mesika iskim ?" Pe
klaska wawa, "Sinamoxt."

Pe yaka wawa kopa klaska, "ikta 21
mamook mesika halo kumtux ?"

Pe yaka ko kopa Bethsaida; pe 22
klaska lolo kopa Jesus ikt man, halo
seahost, spouse mamook klahowyum
yaka.

Pe Jesus iskim yaka lemah pe lolo 23
klahoney okoak town; pe alta yaka
mamook toh kopa yaka eyes, pe ma-
mook midlite lemah kopa yaka, pe wawa
yaka spouse halo ikta yaka nanitch ?

Pe yaka nanitch saghalie pe wawa, 24
"nika nanitch hiyu man kakwa hiyu
stick, cooley."

Waght Jesus mamook midlite lemah 25
kopa yaka eyes, pe wawa yaka spouse
nanitch saghalie, ye paka chako klosch,
pe delate nanitch konaway man.

Pe Jesus wawa spouse wake yaka 26
klatawa kopa town, pe wawa klaxta
kopa town, klosch yaka delate klatawa
kopa yaka house.

- 27 Pe Jesus, konamoxt yaka disciples klatawa kopa Ceserea Philippi ; pe alta klaska cooley kopa wayhut pe yaka wawa kopa klaska, " ikta okoak tillicum wawa spouse klaxta nika ?"
- 28 Pe klaska killapie wawa, " John the Baptist, pe ikt-ikt wawa Elias ; pe huloima klaska wawa ikt okoak prophets."
- 29 Jesus wawa kopa klaska. " Pe ikta mesika wawa spouse klaxta nika ?" Pe Peter kilapie wawa. " Mika okoak Christ."
- 30 Pe yaka wawa klaska spouse halo klaska mamook kumtux klaxta.
- 31 Pe yaka yiem kopa klaska, kahta alki yaka klap hyas kull, pe kahta okoak tyees alki mash yaka, konamoxt okoak laplet, pe okoak Scribes, pe klap memaloost ; pe kopet klone sun pe waght yaka midwhit.
- 32 Pe halo yaka ipsoot ikta yaka wawa. Pe Peter solex wawa kopa yaka.
- 33 Jesus kilapie nanitch yaka disciples,

pe yaka solex kopa Peter, pe wawa kopa yaka, "kloosh mika klata kyimta nika, lejob; kewa mika wake kumtux ikta Saghalie Tyee mamook, kopet mika kumtux ikta man mamook."

Pe alta yaka wawa kopa okoak tilli- 34 cum konamoxt yaka disciples, "spose klaxta tikke konamoxt nika klosh yaka iskim yaka cross pe cooley kyimta nika.

Kewa klaxta tikke wake memaloose 35 alki yaka memaloose; pe klaxta klap memaloose kopa nika, konamoxt nika kloosh yiem, alki yaka halo memaloose.

Kewa ikta alki mika tolo sposse mika 36 klap konaway okoak illahe pe stoh kopa mika tumtum.

Pe ikta alki mika huy-huy kopa mika 37 tumtum.

Kewa klaxta shame kopa nika pe nika 38 wawa, kanamoxt okoak mesatchie tilli-cum; alki nika shame kopa yaka sposse nika chako konamoxt nika papa, yaka glcry, pe okoak holy angels."

Chapter 9.

- 1 Pe Jesus wawa kopa klaska. "De-
late nika wawa kopa mesika, midlite ikt-
ikt tillicum yakwa, wake kahta alki
klap memaloose, kopet spose alki elip
nanitch okoak Saghalie Tyee kingdom
chako, konamoxt yaka skookum."
- 2 Pe kopet taghum sun Jesus klatawa
kopa saghalie mountain, konamoxt
Peter pe James, pe John; pe klaska
nanitch yaka chako huloima.
- 3 Pe yaka iktas chako takwop kakwa
snow; wake kahta klaxta wash iktas
takwop kakwa.
- 4 Pe alta chako kopa klaska seahose
Elias konamoxt Moses; pe klaska kona-
moxt wawa kopa Jesus.
- 5 Pe Peter kilapie wawa kopa Jesus,
"Tyee, delate kloosh nesika midlite
yakwa; pe kloosh nesika mamook klone
house; ikt kopa mika, pe ikt kopa
Moses, pe ikt kopa Elias."

Kewa halo yaka kumtux ikta yaka 6
wawa ; kewa klaska delate kwass.

Pe chako snass smoke pe ipsoot 7
klaska ; pe wawa chako klahoney kopa
okoak snass smoke ; “ okoak nika hyas
tikke tenas ; kwalahn kopa yaka.”

Pe hyak klaska nanitch, pe halo 8
klaska nanitch klaxta man, kopet Jesus
konamoxt klaska.

Pe alta klaska cooley keekwillie kopa 9
mountain, pe yaka skookum wawa
klaska spose wake mamook kumtux
klaxta ikta klaska nanitch, kopet spose
alta yaka kilapie kopa memaloose.

Pe klaska kloosh nanitch ikta yaka 10
wawa, pe klaska hiyu mamook tumtum
ikta okoak kilapie kopa memaloose.

Pe klaska wawa kopa yaka, “ ikta 11
mamook okoak Scribes wawa alki Elias
elip chako ?”

Pe yaka kilapie wawa kopa klaska, 12
“ nawitka Elias elip chako, pe mamook
delate konaway ikta ; pe kahta okoak
midlite tzum kopa Saghalie Tyee tenas,

kopa alki yaka klap kull, pe tillicum mamook kultus yaka.

- 13 Pe nika wawa kopa mesika Elias alta chako, pe klaska mamook ikta klaska tumtum kopa yaka, kakwa midlite tzum kopa yaka."
- 14 Pe alta yaka ko kah midlite yaka disciples, pe yaka nanitch hiyu tillicum konamoxt klaska, pe okoak Scribes hiyu wawa kopa klaska.
- 15 Pe konaway okoak tillicum chako kwah, alta klaska nanitch Jesus; pe klaska hyak cooley kopa yaka, pe wawa klahowya kopa yaka.
- 16 Pe Jesus wawa kopa okoak Scribes, " ikta mamook mesika hiyu wawa kopa klaska ?"
- 17 Pe ikt okoak tillicum kilapie wawa kopa yaka, " tyee, nika lolo nika tenas kopa mika, midlite halo wawa temana-wus kopa yaka ;
- 18 Pe okoak tamanawus kwansum kok-shut yaka, pe yaka chako halo glease ; pe nika wawa kopa mika disciples spose

klaska mash klahoney okoak tamana-
wus, pe klaska halo tolo."

Jesus kilapie wawa kopa yaka, " O 19
tzeepie tillicum, kahta laylie alki nika
konamoxst mesika ? Kahta laylie alki
nika winapie kopa mesika ? lolo yaka
kopa nika."

Pe klaska lolo kopa yaka ; pe hyak 20
okoak tamanawus kokshut yaka, pe
mamook whim yaka kopa illahe.

Pe Jesus wawa kopa yaka papa, 21
" kahta laylie yaka klap okoak ? Pe
yaka wawa, " kopa chee tenass.

Pe ikt-ikt okoak tamanawus mash 22
yaka kopa fire, pe kopa chuck, spouse
mamook memaloose yaka ; pe spouse
mika skookum mamook ikta kopa
yaka, kloosh mamook klahowyum kopa
nesika."

Jesus wawa kopa yaka, " spouse 23
klaxta skookum tumtum yaka tolo
konaway ikta."

Pe hyak okoak papa wawa, pe chako 24
chuck kopa yaka seahost, " tyee, nika

skookum tumtum klosk mamook klahowyum nika."

- 25 Pe Jesus nanitch okoak tillicum hyak chako kah yaka midlite, pe yaka wawa kopa okoak mesatchie tamanawus, "klosk mika chako klahoney kopa yaka, pe wale mika waght klataway kopa yaka."
- 26 Pe okoak tamanawus waght mamook kokshut yaka, pe chako klahoney kopa yaka, pe yaka delate kakwa memaloose; pe hiyu klaska wawa, yaka delate memaloose.
- 27 Pe Jesus iskim yaka lemah pe mamook saghalie yaka; pe yaka midwit.
- 28 Alta yaka ko kopa house, pe yaka disciples ipsoot wawa kopa yaka. "Ikta mamook nesika halo tolo mash yaka klahoney?"
- 29 Pe yaka wawa kopa klaska, "wake kahta okoak cooley klahoney, kopet spouse skookum pray."
- 30 Pe alta klaska klatawa pe klaska

cooley kopa Galilee, pe yaka wake tikke
spose klaxta kumtux.

Kewa yaka yiem kopa yaka disciples, 31
pe wawa kopa klaska, "Saghalie Tyee
tenas alki klap kul kopa mesatchie tilli-
cum, pe alki klaska mamook mema-
loose yaka, pe spouse kopet klone sun
waght yaka midwhit."

Pe klaska halo kumtux okoak kul 32
wawa ; pe klaska kwass wawa yaka.

Pe yaka ko kopa Capernaum ; pe 33
midlite kopa house, yaka wawa kopa
klaska, "ikta okoak mesika konamox
skookum wawa kopa wayhut ?"

Pe klaska halo ikta wawa ; kewa, 34
kopa wayhut, klaska konamox skoo-
kum wawa klaxta alki elip saghalie.

Pe yaka wawa kopa klaska, "spouse 35
klaxta tikke elip, alki yaka kimta kopa
konaway, pe alki yaka mamook kopa
konaway."

Pe yaka iskim ikt tenas kopa yaka 36
lemah, pe yaka wawa kopa klaska.

"Klaxta iskim ikt tenas kopa nika 37

name, kakwa spouse yaka iskim nika ;
pe klaxta iskim nika kakwa spouse yaka
iskim nika papa."

38 Pe John kilapie wawa kopa yaka,
"tyee, nesika nanitch ikt man mash
klahoney tamanawus kopa mika name,
pe halo yaka konamoxt nesika ; pe
nesika mamook kopet yaka, kewa yaka
halo konamoxt nesika."

39 Pe Jesus wawa, "wake mesika ma-
mook kopet yaka ; kewa, wake kahta
klaxta man mamook hyas ikta kopa
nika name, pe waght kultus wawa kopa
nika.

40 Kewa klaxta tikke nesika, wake
kahta klaska halo tikke nesika.

41 Kewa klaxta potlatch mesika ikt lepot
cold chuck kopa nika name, kewa mesika
tikke Christ, wake kahta yaka halo
klap pay.

42 Pe klaxta mamook mesatchie kopa
ikt tenas, klaxta tikke nika, elip klosk
spouse stone kow kopa yaka lakoo, pe
mash kopa hyas salt chuck.

Pe spouse mika lemah mesatchie 43
tl'kope, elip klosk spouse ikt mika lemah
pe klap kopa saghalie; kopa moxt
mika lemah pe klap kopa keekwillie,
kah okoak fire wake konsik kopet.

Kah klaska itlwillie halo memaloose, 44
pe okoak fire wake konsik kopet.

Pe spouse mika lapee mesatchie, 45
tl'kope; elip kloosh spouse ikt mika
lapee pe klap kopa saghalie; kopa
moxt lapee pe klap kopa keekwillie,
kah okoak fire wake konsik kopet;

Kah klaska itlwillie halo memaloose, 46
pe okoak fire wake konsik kopet.

Pe spouse mika eye mesatchie, mash; 47
elip klosk spouse ikt mika eye pe klap
kopa saghalie; kopa moxt mika eye pe
klap kopa keekwillie fire.

Kah klaska itlwillie halo memaloose, 48
pe okoak fire wake konsik kopet.

Kewa alki konaway klaxta lamachin 49
kopa fire, pe konaway sacrifice lama-
chin kopa salt.

Spouse salt chako kultus wake kahta 50

waght mamook skookum. Klash midlite salt kopa mesika, pe midlite klash tumtum kopa konaway mesika."

Chapter 10.

- 1 Pe yaka cooley kopa Judea, inati kopa Jordan, pe okoak tillicum waght cooley ka yaka midlite, pe yaka waght yiem kopa klaska,
- 2 Pe okoak Pharisees chako kopa yaka tikhe kumtux kahta okoak law spouse ikt man mash yaka klootchman ?
- 3 Pe yaka kilapie wawa kopa klaska, " ikta Moses wawa kopa mesika ?"
- 4 Pe klaska wawa, " Moses yaka potlatch law spouse mamook tzum paper, pe mash okoak klootchman."
- 5 Pe Jesus kilapie wawa kopa klaska, " nawitka, kopa mesika kul tumtum kakwa yaka mamook tzum okoak law.
- 6 Pe kopa ankutte Saghalie Tyee mamook man pe klootchman.

Kewa spouse ikt man iskim klootch- 7
man pe yaka kopet konamoxst yaka
papa pe yaka mamma.

Pe klaska chako ikt itlwillie; halo 8
klaska waght moxt, alta klaska ikt.

Spouse Saghalie Tyee mamook kona- 9
way klaska kloosh, halo klaxta mamook
sitkim."

Alta midlite kopa house, pe yaka 10
disciples tikke kumtux kopa okoak.

Pe yaka wawa kopa klaska, " klaxta 11
mash yaka klootchman pe iskim hulo-
ima, yaka kapswalla okoak klootch-
man.

Pe klaxta klootchman mash yaka 12
man pe iskim holoima, yaka kapswalla
okoak man."

Pe klaska lolo tenasses kopa yaka 13
spouse yaka iskim kopa yaka lemah, pe
okoak disciples solex kopa klaska.

Pe Jesus nanitch, pe yaka chako 14
solex kopa yaka disciples, pe wawa
kopa klaska, "klosh okoak tenasses
chako kopa nika, pe halo mesika mash,

kewa klaska delate kakwa okoak saghalie tillicum.

- 15 Nika delate wawa kopa mesika, spose klaxta halo iskim Saghalie Tyee kakwa okoak tenas, wake kahta yaka klap kopa saghalie."
- 16 Pe yaka iskim okoak tenasses kopa yaka lemah, pe potlatch klaska klosk wawa.
- 17 Pe alta yaka cooley kopa wayhut, pe ikt man chako pray kopa yaka pe wawa, "Klosk Tyee, ikt alki nika mamook pe alki nika tolo eternal life?"
- 18 Pe Jesus wawa kopa yaka, " ikt mamook mika wawa nika kloosh? Halo klaxta kloosh, kopet ikt, yaka okoak, Saghalie Tyee.
- 19 Mika kumtux okoak totlum wawa, wake mika kapswalla klootchman, wake mika mamook memaloose tillicum, wake mika kapswalla iktas, wake mika klaminiwhit, wake mika tzeepie mamook, klosk nanitch mika papa pe mika mamma."

Pe yaka kilapie wawa, "tyee, kona- 20
way okoak nika klosk nanitch kwansum
kopa nika tenas man."

Pe Jesus nanitch yaka, ye hyas tikke 21
yaka, pe wawa kopa yaka, "ikt ikta
mika halo klap; klatawa sell konaway
mika iktas, pe potlatch kopa klahowya
tillicum, pe alki mika tolo klosk iktas
kopa saghalie; pe chako iskim okoak
cross pe cooley kyimta nika."

Pe yaka sick tumtum kopa ikta Jesus 22
wawa, pe yaka klatawa cooley kona-
moxst sick tumtum; kewa yaka delate
hiyu iktas.

Pe Jesus nanitch konaway tillicum, 23
pe yaka wawa kopa yaka disciples
kahta hyas kul spouse ko kopa saghalie
illahe, klaxta midlite hiyu iktas.

Pe yaka disciples kwah kopa ikta 24
yaka wawa. Pe Jesus kilapie wawa
kopa klaska, "Tenasses, hyas kul spouse
ko kopa saghalie illahe, klaxta midlite
tumtum kopa klaska iktas.

Elip wake kul spouse camel cooley 25

kopa needle yaka eye, pe kopa rich man ko kopa saghalie illahe."

26 Pe klaska delate kwah pe klaska konamoxt wawa, "klaxta alki saved?"

27 Pe Jesus nanitch kopa klaska pe wawa kopa tillicum, kopa man wake kahta, pe huloima kopa Saghalie Tyee; kewa wake kul konaway ikta kopa Saghalie Tyee."

28 Pe Peter wawa kopa yaka; "nanitch, nesika mash konaway ikta, pe cooley kyimta kopa mika."

29 Pe Jesus wawa, "nika delate wawa kopa mesika, klaxta mash yaka house, yaka ow, yaka papa, yaka mamma, yaka klootchman, yaka tenasses, or yaka illahe, spose yaka elip tikke nika, pe okoak kloskhiem ;

30 Alki yaka tolo elip hiyu kopa okoak illahe, house, pe ow, pe mamma, pe tenasses, pe illahe, konamoxt kul moomook; pe eternal life kopa saghalie illahe.

31 Pe hiyu klaxta alta elip alkie klaska

kyimta, pe klaxta kyimta alkie klaska elip."

Pe klaska cooley kopa Jerusalem, pe 32
Jesus elip cooley. Pe klaska kwah, pe
waght klaska kwass. Pe Jesus yiem
kopa okoak totlum pe moxt, kahta
alkie yaka klap.

Pe yaka wawa, "nanitch nesika 33
cooley kopa Jerusalem, pe alkie okoak
tyee laplet, pe okoak Scribes, mash nika
kopa okoak Gentiles, spose mamook
memaloose nika.

Pe alkie klaska hee-hee kopa nika, pe 34
kokshut nika, pe mamook memaloose
nika; pe klone sun alkie nika waght
midwhit."

Pe James, pe John, Zebedee ten- 35
asses, klaska wawa kopa yaka, "Tyee,
nesika tikke spose mika mamook kopa
nesika ikta nesika tikke."

Pe yaka wawa kopa klaska, "ikta 36
mesika tikke spose nika mamook kopa
mesika?"

Klaska wawa kopa yaka, "nesika 37

tikke midlite kopa mika right hand, pe mika left hand spouse mika klap kopa Saghalie."

- 38 Pe Jesus wawa kopa klaska, " mesika halo kumtux ikta okoak mesika tikke." " Nawitka mesika skookum spouse mukamuk kopa nika lapot ? pe klap baptize kopa kahta nika baptized ?"
- 39 Pe klaska wawa, " nawitka." Pe Jesus wawa kopa klaska, " alkie mesika mukamuk kopa nika lapot ; pe alkie mesika klap baptize kopa kahta nika baptized ;
- 40 Pe spouse midlite kopa nika right hand pe nika left hand, wake nikas spouse potlatch mesika ; pe klaxta tolo kloosh, alkie klaska klap okoak."
- 41 Pe okoak totlum kumtux okoak, pe klaska solax kopa James pe John.
- 42 Pe Jesus wawa kopa klaska, " mesika nanitch spouse klaxta tyee kopa Gentiles, kahta yaka delate saghalie kopa yaka tillicum ;
- 43 Pe wake alkie kakwa kopa mesika ;

spose klaxta tikke saghalie kopa mesika,
klosh yaka elip keekwillie kopa kona-
way.

Pe klaxta tikke elip saghalie, kloosh 44
yaka kakwa elite kopa konaway.

Kewa nika chako kopa okoak illahee 45
spose nika mamook, wake spouse nika
tyee; pe potlatch nika itlwillie spouse
makook hiyu tillicum."

Pe klaska ko kopa Jericho; pe alta 46
yaka cooley klahoney kopa Jericho,
konamoxt yaka disciples, pe hiyu tilli-
cum; pe ikt blind man, klahowyum,
midlite kopa wayhut, Bartimaeus yaka
name, Timaeus yaka papa name.

Pe alta yaka kumtux Jesus cooley, 47
pe yaka hyas wawa; "Jesus, mika
tenas kopa David, mamook klahowyum
nika."

Pe hiyu klaxta tikke mamook kopet 48
yaka wawa, pe wake kahta; yaka elip
hyas wawa, "mika tenas kopa David,
mamook klahowyum nika."

Pe Jesus kopet cooley, pe wawa spouse 49

klaska lolo yaka, pe klaska wawa kopa okoak blind man, "kloosh mika skookum tumtum midwhit, yaka tikke mika."

50 Pe yaka mash yaka pasissie, pe cooley kopa Jesus.

51 Pe Jesus wawa kopa yaka, "ikta miks tikke spouse nika mamook kopa mika?" Okaak blind man wawa kopa yaka, "Tyee, nika hyas tikke klap nanitch."

52 Pe Jesus wawa kopa yaka, "kloosh mika klatawa; kewa mika skookum tumtum kakwa mika klap kloosh." Pe hyak chako halaktl yaka seahost, pe yaka cooley kyimta Jesus kopa wayhut.

Chapter 11.

1 Pe alta klaska ko wake siah kopa Jerusalem, kopa Bethphage, pe Bethany, kopa Mount of Olives, pe yaka mash moxt yaka disciples.

2 Pe wawa kopa klaska, "kloosh me-

sika cooley kopa okoak tenas town, pe
spose mesika ko, alkie mesika nanitch
cuitan tenas, kloosh mesika stoh, he
lolo yaka.

Pe spouse klaxta man wawa, ikta 3
mesika mamook ? alkie mesika wawa,
okoak Tyee tikke yaka ; pe alki yaka
hyak potlatch mesika.

Pe nawitka klaska ko kah midlite 4
moxt wayhut, pe klaska klap okoak
cuitan tenas, klahoney kopa laport, pe
klaska stoh yaka.

Pe tillicum midwhit yawa, pe ikt-ikt 5
klaska wawa, " ikta mamook mesika
stoh okoak cuitan tenas ? "

Pe okoak disciples mamook kumtux 6
klaska ikta Jesus wawa, pe hyak klaska
potlatch okoak cuitan tenas.

Pe klaska lolo okoak cuitan tenas 7
kopa Jesus, pe klaska mash klaska
pasissie kopa yaka, pe Jesus midlite
kopa yaka.

Pe hiyu klaxta mash klaska pasissie 8
kopa wayhut, pe ikt-ikt mamook kok-

shut lemah kopa stick, pe mash kopa wayhut.

- 9 Pe klaxta cooley elip, pe klaxta cooley kyimta, klaska hyas wawa, "Hosanna, Delate kloosh okoak klaxta chako kopa Saghalie Tyee name.
- 10 Delate kloosh okoak kingdom kopa nesika papa David, klaxta chako kopa Saghalie Tyee name, Hosanna kopa elip Saghalie."
- 11 Pe Jesus ko kopa Jerusalem, pe yaka klatawa kopa Sunday house, pe yaka nanitch konaway ikta midlite; pe alta chako polakilie pe yaka klatawa kopa Bethany konamoxt okoak totlum pe moxt.
- 12 Pe chako sun klaska mash kopa Bethany, pe yaka olo;
- 13 Pe yaka nanitch fig stick siah, midlite tipso, pe yaka chako nanitch spouse olalie midlite; pe alta yaka ko pe kopit tipso yaka nanitch.
- 14 Pe Jesus wawa kopa okoak stick, "Halo klaxta waght mukamuk kopa

mika olalie." Pe yaka disciples kum-
tux ikta yaka wawa.

Pe klaska ko kopa Jerusalem ; pe 15
Jesus klattaway kopa Sunday house,
pe yaka mash klahoney klaxta makook ;
pe klaxta huyhuy chickaman yaka
mamook kilapie klaska latab ; pe okoak
lashase klaxta makook kilakila ;

Pe wake yaka tikke spouse klaxta 16
man lolo ikta kopa Sunday house.

Pe yaka yiem kopa klaska ikta Sag- 17
halie Tyee wawa, " kanaway kah illahe
kumtux nika house spouse kah tillicum
pray, pe mesika mamook pahtl kopa
kapswalla tillicum."

Pe okoak Scribes pe okoak tyee lap- 18
lete kumtux ikta yaka mamook, pe
klaska mamook tumtum spouse mema-
loost yaka, pe klaska kwass kopa tilli-
cum, kewa konaway klaxta kwa kopa
ikta yaka wawa.

Pe chako polakilie, pe yaka klatawa 19
klahoney kopa town.

Pe waght chako sun klaska cooley 20

kopa wayhut, pe klaska nanitch okoak fig stick delate alta memaloose.

21 Pe Peter wawa, " nah Tyee ! nanitch okoak fig stick alta chako dry !"

22 Pe Jesus kilapie wawa, " kloosh midlite tumtum kopa Saghalie Tyee.

23 Kewa nika delate wawa kopa mesika, spouse klaxta wawa kopa okoak mountain, kloosh mika klatawa kopa salt chuck, pe yaka delate skookum tumtum ikta yaka wawa ; alki yaka kakwa.

24 Kewa nika wawa kopa mesika, spouse mesika pray, kloosh mesika skookum tumtum pe alkie mesika klap ikta mesika tikke.

25 Pe spouse mesika pray, pe midlite klaxta mesatchie kopa mesika, mamook klahowya yaka, pe Saghalie Tyee alkie mamook klahowya mesika.

26 Pe spouse halo mesika mamook klahowyum kopa tillicum, wake kahta Saghalie Tyee mamook klahowyum mesika."

27 Pe klaska waght ko kopa Jerusalem ;

pe yaka cooley kopa Sunday house, pe
okoak tyee laplete pe okoak Scribes, pe
okoak Elders chako kopa yaka,

Pe klaska wawa kopa yaka, " kah 28
mika klap skookum spouse mamook ikta
mika mamook, pe klaxta potlatch mika
okoak skookum ?"

Pe Jesus kilapie wawa kopa klaska, 29
" nika waght ask mesika ikt wawa, pe
spouse mesika delate wawa, alkie nika
mamook kumtux mesika klaxta pot-
latch nika skookum spouse mamook ikta
nika mamook."

" Klaxta potlatch skookum kopa 30
John spouse baptise, Saghalie Tyee or
tillicum ? Kloosh mesika wawa."

Pe klaska mamook tumtum kona- 31
moxt, spouse nesika wawa Saghalie Tyee,
alkie yaka wawa Ikta mamook mesika
halo iskim ?

Pe spouse nesika wawa kopa tillicum ; 32
klaska kwass ; kewa konaway tillicum
tumtum John delate klap skookum
kopa Saghalie Tyee.

- 33 Pe klaska kilapie wawa kopa Jesus, "halo nesika kumtux." Pe Jesus waght kilapie wawa kopa klaska, "wake kahta nika waght mamook kumtux mesika kah nika klap skookum spouse mamook ikta nika mamook."

Chapter 12.

- 1 Alta yaka yiem kopa parables. Ikt man mamook midlite olallie stick kopa yaka illahe, pe mamook kalahan, pe mamook klawhap spouse kah kokshut olalie, pe mamook saghalie house, pe yaka lend kopa klaxta kloosh nanitch, pe yaka klatawa kopa siah illahe.
- 2 Pe alta okoak olalie chako fire, pe yaka mash ikt man spouse iskim olalie kopa yaka illahe.
- 3 Pe okoak klaxta kloosh nanitch illahe klaska mamook kokshut yaka, pe halo potlatch yaka olalie.
- 4 Pe waght okoak Tyee mash ikt man,

pe klaska kokshut yaka latet kopa
stone, pe mash yaka klahoney.

Pe waght yaka mash ikt man, pe 5
klaska memaloost yaka ; pe waght yaka
mash hiyu, pe ikt ikt klaska kokshut,
pe ikt-ikt klaska memaloost.

Pe okoak tyee klap tumtum, pe yaka 6
mash yaka tenas, pe yaka wawa, " Alkie
klaska kloosh nanitch nika tenas."

Pe alta klaska nanitch yaka, pe 7
klaska konamoxt wawa, " kloosh nesika
memaloost yaka pe alkie nesika okoak
illahe."

Pe klaska iskim yaka pe memaloost 8
yaka, pe mash yaka klahoney kopa
okoak illahe.

Ikta alkie okoak tyee mamook ? 9
Alkie yaka chako, pe mamook mema-
loose klaska, pe mamook midlite hulo-
ima kopa yaka illahe.

Halo mesika read ikta Saghalie Tyee 10
wawa, " okoak builders mash ikt stone,
pe okoak stone alta chako elip kloosh
stone kopa house.

- 11 Saghalie Tyee mamook okoak, pe kakwa kwah kopa nesika seahoose.”
- 12 Pe okoak mesatchie tillicum kumtux okoak yiem, kakwa spouse mamook klahoney klaska mesatchie ; pe klaska tikke iskim yaka, pe klaska kwass kopa okoak tillicum.
- 13 Pe waght klaska mash okoak Phari-sees pe okoak Herodians kopa yaka, spouse klap ikta yaka tzeepie wawa.
- 14 Pe alta klaska ko pe klaska wawa, “Tyee, nesika kumtux mika delate, pe halo mika kwass kopa klaxta man, kopet Saghalie Tyee mika kloosh nanitch ; kahta mika tumtum, kloosh or halo kloosh spouse potlatch chickamin kopa Caesar ?
- 15 Alkie nesika potlatch, or alkie nesika halo potlatch ?” Pe Jesus. kumtux klaska ipsoot klaska tumtum, pe yaka wawa ; “lolo chickamin kopa nika spouse alki nika nanitch.”
- 16 Pe klaska lolo ikt penny. Pe yaka wawa kopa klaska, “ klaxta okoak sea-

hoose, pe tzum ?” Pe klaska wawa
“Caesars.”

Pe Jesus kilapie wawa kopa klaska, 17
“potlatch kopa Caesar Caesar’s iktas,
pe potlatch kopa Saghalie Tyee Sag-
halie Tyee’s iktas.” Pe klaska kwah
kopa yaka.

Alta chako kopa yaka okoak Sadu- 18
cees, klaska wawa wake kahta mema-
loost tillicum waght midwhit ; pe klaska
wawa kopa yaka.

“Tyee, Moses mamook tzum, spouse 19
ikt man memaloost pe halo yaka tenas,
alki yaka ow iskim okoak klootchman,
kakwa spouse huy-huy, okoak mema-
loost.

Midlite sinamoxt ow kopa nesika, pe 20
okoak elip ow iskim klootchman pe
memaloost, pe halo yaka klap tenas.

Pe waght ikt ow iskim okoak klootch- 21
man pe yaka memaloost pe halo yaka
klap tenas ; pe waght okoak ikt kakwa.

Pe kanaway okoak sinamoxt iskim 22
okoak klootchman pe halo klaska klap

tenas, pe kyimta okoak klootchman memaloost.

23 Spose midwhit konaway memaloost tillicum, klaxta alkie iskim yaka, kewa kanaway okoak sinamoxst konamoxst yaka kopa okoak illahe ?”

24 Pe Jesus kilapie wawa kcpa klaska. “Mesika halo kumtux Saghalie Tyee wawa, pe kahta yaka skookum, kakwa mesika tzeepie ;

25 Kewa spose alkie kanaway memaloost tillicum midwhit, wake alkie klaska konamoxst married, pe alkie klaska kakwa okoak angels kopa Saghalie.

26 Pe kopa okoak alkie midwhit memaloost tillicum halo mesika read ikta Moses tzum, kahta Saghalie Tyee wawa kopa yaka. Nika Saghalie Tyee kopa Abraham, kopa Isaac, pe kopa Jacob ?

27 Wake yaka Saghalie Tyee kopa okoak memaloost, yaka Saghalie Tyee kopa okoak halo memaloost ; delate mesika tzeepie.”

Pe ikt okoak Scribes kumtux kahta 28
Jesus delate wawa kopa klaska, pe yaka
wawa kopa Jesus, "ikta okoak elip
wawa kopa okoak commandments?"

Pe Jesus kilapie wawa, "okoak elip 29
kopa okoak commandments, Kwahlan O
Israel; kopet ikt okoak Saghalie Tyee;

Kloosh mika hyas tikke Saghalie Tyee 30
kopa kanaway mika tumtum, kopa
kanaway mika soul, kopa kanaway mika
latet, pe kopa kanaway mika skookum.
Yaka okoak elip commandment.

Pe okoak ikt wake siah kakwa, 31
Kloosh mika hyas tikke mika tillicum
kakwa mika self. Okoak command-
ment elip skookum kopa kanaway
Saghalie Tyee wawa."

Pe okoak Scribe wawa kopa yaka, 32
"Nawitka, Tyee, mika delate wawa,
kewa kopet ikt okoak Saghalie Tyee;

Pe sponse man hyas tikke yaka, 33
kopa kanaway yaka tumtum, pe kopa
kanaway yaka latet, pe kopa kanaway
yaka soul, pe kopa kanaway yaka

skookum ; pe waght tikke yaka tillicum kakwa yaka self, elip kloosh kopa kana-way burnt offerings pe sacrifices."

34 Pe Jesus kumtux kahta yaka delate wawa, yaka mamook kilapie wawa kopa yaka, "mika wake siah kopa Saghalie Tyee." Pe halo klaxta waght wawa ikta kopa yaka.

35 Pe Jesus waght yiem kopa Sunday house, pe yaka wawa kopa klaska. Ikta mamook okoak Scribes wawa Christ yaka Davids tenas ?

36 Kewa David wawa kopa Holy Ghost, Saghalie Tyee wawa kloosh mika mid-lite kopa nika right hand pe alki nika mash mika enemy keepwillie kopa mika lapee.

37 Spose David wawa, nika Tyee yaka, kahta yaka waght wawa, nika tenas yaka ? Pe okoak tillicum kloosh tum-tum kopa ikta yaka wawa.

38 Pe Jesus waght wawa, "kloosh nan-itch okoak Scribes, klaska hyas tikke long coat, pe spouse tillicum mamook

keekwillie latet kopa klaska, kah klaska
makook.

Pe okoak elip kloosh le shase kopa 39
Sunday house, pe okoak elip Saghalie
kah Tyee potlatch mukamuk ;

Klaska kapsewalla house kopa kla- 40
howya klootchman, pe ipsoot klaska
masatchie, keekwillie kopa long pray ;
alkie klaska klap kahta klaska mesa-
tchie."

Pe Jesus midlite wake siah kah tilli- 41
cum mash chickamin, pe yaka nanitch
ikt-ikt tyee mash hiyu.

Pe ikt klahowya klootchman, halo 42
yaka man, yaka mash moxt tenas
chickamin kakwa ikt farthing.

Pe yaka wawa kopa yaka disciples, 43
nanitch okoak klahowya klootchman,
yaka mash elip hiyu kopa konaway
klaxta.

Kewa kanaway klaska mash tenas 44
kopa klaska chickamin, pe okoak kla-
howya klootchman yaka mash delate
kanaway yaka chickamin.

Chapter 13.

- 1 Pe alta yaka cooley klahoney kopa Sunday house, pe yaka disciples wawa kopa yaka, " Tyee, nanitch kahta okoak stone, pe kahta okoak house !"
- 2 Pe Jesus killapie wawa kopa klaska, " mesika nanitch okoak hyas house ? Alkie kanaway kokshut, pe alkie halo ikt stone saghalie kopa ikt stone."
- 3 Pe yaka midlite kopa Mount of Olives, konamoxt Peter, pe James, pe John, pe Andrew, pe klaska tikke kumtux kopa yaka,
- 4 " Kahta laylay pe alkie kakwa okoak ikta mika wawa ? Pe kahta alkie nesika kumtux ?"
- 5 Pe Jesus kilapie wawa kopa klaska, " kloosh nanitch spouse halo klaxta mamook tseepie mesika,
- 6 Kewa alkie hiyu klaxta chako kopa nika name, pe wawa, Nawitka nika Christ, pe mamook tseepie hiyu tilli-cum.

Pe alkie mesika kumtux hiyu fight 7
kanaway kah, kloosh halo mesika sick
tumtum ; wake kahta spouse halo okoak
kanaway ikta mamook, pe okoak kyimta
halo hyak chako.

Alkie ikt illahe solex kopa ikt illahe, 8
pe ikt king solex kopa ikt king, pe alkie
okoak illahe toto, pe alki ikt-ikt illahe
halo mukamuk, yawa alkie chako sick
tumtum.

Pe kloosh nanitch kopa mesika ; 9
kewa alkie klaska mash mesika kopa
council ; pe alkie klaska kokshut mesika
kopa Sunday house ; pe alkie klaska
lolo mesika kopa Tyee pe kopa Kings,
kewa mesika tikke nika ; pe alkie
mesika witness kopa klaska.

Pe okoak kloosh yiem alkie elip klap 10
kopa kanaway kah illahe.

Pe spouse klaska lolo mesika, mash 11
mesika kah, kloosh wake mesika ma-
mook tumtum ikta alkie mesika wawa ;
alkie okoak Holy Spirit mamook kum-
tux mesika ikta alkie mesika wawa.

- 12 Alkie okoak ow mash yaka ow kah alkie yaka memaloose, pe okoak papa mash yaka tenas, pe okoak tenasses alkie klaska mash klaska papa pe klaska mamma kah alkie klaska klap memaloose.
- 13 Pe alkie kanaway klaxta mesatchie tumtum kopa mesika, kewa mesika tikke nika; pe klaxta halo kilapie tumtum alkie yaka saved.
- 14 Pe spouse mesika nanitch ikta Daniel wawa, kopa okoak hyas kul alkie klap mesika; kloosh klaxta midlite Judea hyak klatawa kopa mountain.
- 15 Pe klaxta midlite saghalie kopa house kloosh halo chako keekwillie spouse iskim ikta kopa okoak house.
- 16 Pe spouse klaxta midlite kopa illahe kloosh halo yaka kilapie spouse iskim yaka iktas.
- 17 Pe elip hyas kul kopa klootchman spouse midlite tenas, pe spouse potlatch tatoosh kopa tenas.

Pe kloosh mesika pray spouse wake 18
mesika cooley kopa cold illahe.

Kewa alkie hiyu sick kopa okoak 19
time, halo kakwa ankuttie, kahta laylee
Saghalie Tyee mamook okoak illahe, pe
wake alkie waght kakwa.

Pe spouse Saghalie Tyee halo mamook 20
tl'kope okoak sun, wake kahta klaxta
saved ; pe kopa okoak kloosh tillicum,
klaxta yaka tikke, yaka mamook tl'kope
okoak sun.

Pe spouse klaxta man wawa, " Newha, 21
yakwa midlite Christ ; or, yawa midlite ;"
kloosh halo iskim yaka wawa.

Kewa tleminawhit Christs, pe tlmina- 22
whit prophets alkie midlite pe mamook
hyas kul mamook, spouse mamook tsee-
pie okoak kloosh tillicum.

Kloosh nanitch, nika elip mamook 23
kumtux mesika kanaway okoak ikta.

Pe spouse kopit okoak hyas kul ma- 24
mook, alkie okoak sun memaloose, pe
okoak moon chako polakalie.

Pe okoak tsil-tsil alkie chako keek- 25

willie, pe okoak skookum midlite kopa saghalie alkie hullel.

26 Pe yawa alkie klaska nanitch okoak Saghalie Tyee Tenas chako kopa okoak saghalie smoke, konamoxst skookum, pe glory.

27 Pe alkie yaka mash yaka angels, pe alkie klaska iskim okoak kloosh tillicum kopa kanaway kah illahe.

28 Kloosh mesika kumtux okoak fig stick, spose chee chako yaka tipso, mesika kumtux wake siah chako warm illahe.

29 Waght kakwa mesika, spose mesika nanitch okoak ikta nika wawa, alki mesika kumtux yaka wake siah kopa mesika lapote.

30 Nika delate wawa kopa mesika, okoak chee tillicum wake alki memaloose, pe alki chako kanaway okoak ikta nika wawa.

31 Okoak saghalie, pe okoak illahe alki memaloose, pe nike wawa wake kahta memaloose.

Pe kopa kahta sun, pe kahta tin-tin 32
halo klaxta kumtux, pe waght okoak
angels, pe waght okoak Tenas, kopet
okoak Papa.

Newha, kloosh nanitch pe pray; 33
kewa mesika halo kumtux kahta laylie.

Kewa okoak Saghalie Tyee Tenas 34
kakwa ikt man spouse cooley kopa siah
illahe, pe yal potlatch mamook kopa
yaka servants, pe yaka wawa okoak
man midlite kopa lapote spouse kloosh
nanitch.

Waght nika wawa mesika, kloosh 35
nanitch, kewa wake mesika kumtux
kahta laylie pe chako kilapie okoak
Tyee; klonas tenas polakalie, klonas
sitkum polakalie, klonas kopa wawa
okoak chickens, klonas kopa tenas sun.


Pe hyas kul spouse yaka hyak chako 36
pe mesika moosum.

Pe ikta nika wawa kopa mesika nika 37
wawa kopa kanaway, kloosh nanitch."



MICROCOPY RESOLUTION TEST CHART

(ANSI and ISO TEST CHART No. 2)



APPLIED IMAGE Inc

1653 East Main Street
Rochester, New York 14609 USA
(716) 482 - 0300 - Phone
(716) 288 - 5989 - Fax

Chapter 14.

- 1 Alkie moxt sun pe feast kopa pass-over, pe kopa halo lamachin sapolil; pe okoak tyee laplet, pe okoak scribes tikke ipsoot iskim yaka, pe mamook memaloose yaka.
- 2 Pe klaska wawa, wake kopa okoak feast sun, kewa okoak tillicum alki hiyu solex.
- 3 Pe Jesus mukamuk kopa Bethany, midlite kopa Simon okoak leper yaka house, pe ikt klootchman lolo hyas makook grease, midlite kopa alabaster lacaset; pe yaka kokshut okoak lacaset, pe mash okoak grease kopa yaka latet.
- 4 Pe ikt-ikt okoak tillicum solex, pe klaska wawa, "ikta mamook yaka kultus mash okoak grease?"
- 5 Kewa spouse sell okoak, pe mesika klap klone hundred pence, pe potlatch kopa klahowya tillicum," pe klaska solex kopa okoak klootchman.
- 6 Pe Jesus wawa, "ikta mamook me-

sika potlatch yaka sick tumtum ? yaka
kloosh mamook kopa nika.

Okoak klahowya tillicum kwansum 7
midlite kopa mesika, pe kahta sun
mesika mamook ikta mesika tikke ma-
mook kloosh kopa klaska; pe wake alkie
nika kwansum midlite kopa mesika

Yaka tumtum, ikta yaka mamook ; 8
yaka mamook kloosh nika itlwillie elip
nika klap kopa illahe.

Nika delate wawa kopa mesika, kah 9
alkie okoak kloosh yiem klap, kopa
kanaway kah illahe, alkie tillicum kum-
tux ikta okoak klootchman mamook
kopa nika."

Pe Judas Iscariot, ikt okoak totlum- 10
pe-mox, yaka klatawa kopa okoak
tyee laplet, spouse mamook kumtux kah
Jesus midlite.

Pe klaska kloosh tumtum kopa ikta 11
Judas wawa, pe klaska alkie potlatch
chickamin kopa yaka. Pe yaka ma-
mook tumtum kahta alkie yaka ma-
mook.

- 12 Pe okoak elip sun kopa feast, alta klaska kopet memaloost okoak lamuto, yaka disciples wawa kopa yaka, " kah alki nesika mamook kloosh kah mike alkie mukamuk okoak passover ?"
- 13 Pe yaka wawa kopa moxt yaka disciples, " kloosh mesika klatawa kopa town pe alkie mesika nanitch ikt man lolu chuck, cooley kyimta yaka.
- 14 Pe kah house yaka ko kloosh mesika wawa kopa okoak klooshman kah mid-lite okoak room kah alkie nesika Tyee mukamuk okoak passover konamoxt yaka disciples ?
- 15 Pe alkie yaka mamook nanitch mesika ikt hyas room kopa saghalie ; yawa mesika mamook kloosh nesika feast."
- 16 Pe okoak disciples klatawa kopa town, pe klaska klap delate kakwa yaka wawa kopa klaska ; pe klaska mamook kloosh okoak passover.
- 17 Pe tenass polakalie yaka chako konamoxt okoak totlum pe moxt.
- 18 Pe alta klaska iskim mukamuk, pe

Jesus wawa, " Nika delate wawa kopa mesika, alkie nika klap mesatchie kopa ikt mesika konamoxt nika mukamuk."

Pe klaska klap sick tumtum, pe 19 kanaway klaska tikke kumtux klaxta ?

Pe Jesus kilapie wawa kopa klaska, 20 " klaxta lemah midlite kopa lasiet konamoxt nika lemah.

Midlite tzum kopa Saghalie Tyee 21 Tenass, alkie nawitka yaka klatawa, pe delate hyas kul kopa okoak man, klaxta alkie mash yaka, elip kloosh spose okoak man halo born."

Pe Jesus bless okoak sapolil, pe 22 kokshut, pe potlatch kopa klaska, pe wawa, " Iskim, mukamuk, okoak nika itlwillie."

Pe yaka iksim lapot, pe alta yaka 23 kopet wawa mahsie, yaka potlatch kopa klaska ; pe klaska kanaway mukamuk.

Pe yaka wawa kopa klaska, " Nika 24 pil-pil okoak, kakwa nika delate wawa, nika mash kopa hiyu.

Nika delate wawa kopa mesika, Nika 25

kopet mukamuk okoak olallie chuck yakwa, na alkie nika waght mukamuk chee kopa saghalie illahe."

26 Pe kopet klaska sing, pe klaska cooley kopa Mount of Olives.

27 Pe Jesus wawa kopa klaska, "kanaway mesika alkie klap mesatchie okoak polakalie; kewa midlite tzum, 'Nika kokshut okoak shepherd, pe okoak lamuto alkie cooley kanaway kah.'

28 Pe spouse nika waght midwhit, alkie nika elip kopa mesika cooley kopa Galilee."

29 Pe Peter wawa kopa yaka, "spouse kanaway klaxta mash mika, wake alkie nika."

30 Pe Jesus wawa kopa yaka, "Nika delate wawa kopa mika, alkie okoak chickens halo moxt wawa okoak polakilie, pe klone time mika klaminawhit kopa nika."

31 Pe Peter skookum wawa, "spouse nika konamoxt mika memaloost alkie wake nika klaminawhit kopa mika." Pe kanaway klaska wawa kakwa.

Pe klaska ko kopa ikt illahe, yaka 32
name Gethsemane ; pe yaka wawa kopa
yaka disciples, kloosh midlite yakwa,
pe alkie nika pray.

Pe yaka iskim Peter, pe James, pe 33
John, pe yaka chako kwah, pe delate
till tumtum.

Pe wawa kopa klaska, " Nika delate 34
kakwa memaloose kopa sick tumtum ;
midlite yakwa pe kloosh nanitch."

Pe yaka cooley tenass siah, pe kla- 35
tawa whim kopa illahe, pe yaka pray
spose kahta yaka wake klap hyas kul.

Pe yaka wawa, " Abba, Papa, kana- 36
way ikta wake kul kopa mika ; kloosh
mika iskim okoak lapot ; pe wake spouse
nika tumtum, kloosh spouse ikta mika
tumtum."

Pe yaka kilapie pe klaska sleep ; pe 37
yaka wawa kopa Peter, " Simon na-
witka mika sleep ? nawitka, hyas kul
spose mika kloosh nanitch kopa ikt
tintin ?

Kloosh nanitch, pe pray spouse halo 38
mesika klap tzeepie. Okoak tumium

skookum, pe okoak itlwillie wake skookum."

39 Pe waght yaka klatawa pray; pe yaka waght wawa ikta yaka elip wawa.

40 Pe waght yaka killapie pe klaska sleep, (kewa klaska eyes hyas till,) pe halo klaska kumtux killapie wawa kopa yaka.

41 Pe alta klone time yaka waght klap klaska sleep, pe yaka wawa kopa klaska, "kloosh mesika sleep, mamook kloosh mesika itlwillie; alta pahtl, okoak tintin chako; Nanitch okoak mesatchie tillicum alta iskim okoak Saghalie Tyee Tenass kopa klaska lemah.

42 Midwhit, kloosh nesika klatawa; nanitch okoak klaxta mamook mesatchie nika, alta midlite."

43 Jesus halo alta kopet wawa, pe Judas, ikt okoak totlum-pe-moxt hyak chako, konamoxt delate hiyu, pe klaska midlite knife pe stick, kopa okoak tyee laplet, pe okoak scribes, pe okoak elders.

44 Pe okoak klaxta lolo klaska, yaka

mamook kumtux klaska, " spouse klaxta nika bebe yaka okoak ; klosk mesika iskim yaka pe lolo yaka."

Pe alta yaka ko pe hyak yaka cooley 45 kopa Jesus pe wawa, Tyee, tyee ; pe bebe yaka.

Pe klaska mash klaska lemah kopa 46 yaka, pe iskim yaka.

Pe ikt okoak klaxta midwhit, iskim 47 yaka knife, pe mash yaka kwolahn okoak servant kopa tyee laplet.

Pe Jesus killapie wawa kopa klaska, 48 " kakwa spouse nika kapswalla, kakwa mesika lolo knife pe stick spouse iskim nika ;

Nike midlite Sunday house kanaway 49 sun, yiem, pe wake mesika iskim nika ; pe alkie delate kakwa ikta Saghalie Tyee wawa."

Pe kanaway yaka tillicum mash yaka, 50 pe hyak klatawa.

Pe ikt tenass man cooley kyimta 51 yaka, kopet sail midlite kopa yaka itlwillie, pe klaska iskim yaka.

- 52 Pe yaka mash okoak sail, pe hyak klatawa halo ikta midlite.
- 53 Pe klaska lolo Jesus kopa tyee laplet, pe kanaway laplet, pe elders, pe scribes chako kah yaka midlite kopa laplet court-house.
- 54 Pe Peter waght cooley kopa laplet court-house, pe yaka midlite siah, pe yaka konamoxt okoak servants wake siah kopa fire, tikke klap warm.
- 55 Pe okoak tyee laplet, pe kanaway okoak council tikke witness, spose mamook memaloose Jesus, pe halo klaska 'klap.
- 56 Hiyu klaxta kliminawhit, pe halo klaska ikt wawa.
- 57 Pe waght huloima midwhit, pe klaska kliminawhit.
- 58 Pe klaska wawa, "Nesika kwolahn yaka wawa, 'alkie nika kokshut okoak Sunday house, pe alkie nika waght mamook kloosh kopa klone sun.'
- 59 Pe waght klaska wawa halo konamoxt.

Pe okoaktyee lapletmidwhit, pewawa 60
kopa Jesus, "Ealo ikta mika wawa?
Ikta okoak klaska witness kopa mika?"

Pe yaka halo wawa ikta. Wagh: 61
okoak tyee laplet wawa kopa yaka,
"Nawitka mika Christ, mika Saghalie
Tyee Tenass?"

Pe Jesus wawa, "Nawitka; pe alkie 62
mesika nanitch Saghalie Tyee Tenass,
konamoxt yaka skookum, chako kopa
okoak saghalie smoke."

Pe okoak tyee laplet mamook kok- 63
shut yaka iktas, pe wawa, "Ikta ma-
mook spouse waght witness?"

Mesika kwolahn yaka mesatchie wa- 64
wa; ikta me'ika tumtum?" Pe kana-
way klaska wawa, "kloosh yaka mena-
loose."

Pe ikt-ikt mamook toh yaka, pe 65
kokshut yaka, pe wawa kopa yaka,
Prophecy; pe okcak servants kokshut
yaka kopa klaska lemah.

Pe ikt klootchman, servant kopa tyee 66
laplet cooley kah Peter midlite.

- 67 Pe yaka nanitch Peter mamook warm,
pe yaka wawa, " waght mika konamox
Jesus of Nazareth."
- 68 Pe Peter klaminawhit wawa, " Halo
nika kumtux ikta mika wawa." Pe
yaka cooley klahoney, pe yaka kumtux
kwolahn okoak chickens wawa.
- 69 Pe waght ikt klootchman nanitch
yaka pe yaka wawa kopa midwhit tilli-
cum, " yaka waght ikt kopa klaska."
- 70 Pe waght yaka klaminawhit. Pe
tenass laylie okoak klaxta midwhit kah
Peter midlite, klaska wawa kopa yaka,
" Delate mika ikt kopa klaska ; kewa
mika Galilean, pe mika lalong kakwa."
- 71 Pe yaka chako mesatchie laboosh, pe
yaka wawa, " Haio nika kumtux okoak
man."
- 72 Pe waght okoak chickens wawa. Pe
Peter mamook tumtum ikta Jesus wawa
kopa yaka, " Alkie moxt times okoak
chickens wawa, pe mika klone times
klaminawhit kopa nika." Pe yaka klap
sick tumtum pe yaka cry.

Chapter 15.

Alta chako tenass sun pe okoak tyees 1
laplet mamook tumtum konamox
okoak elders, pe okoak scribes, pe
kanaway okoak council, pe klaska
mamook kow Jesus pe lolo yaka kopa
Pilate.

Pe Pilate wawa kopa yaka, "Na- 2
witka mika King kopa Jews?" Pe
yaka killapie wawa kopa Pilate, "mika
delate wawa."

Pe okoak tyees laplet mamook hiyu 3
ikta wawa kopa yaka; pe yaka halo
killapie ikta wawa.

Pe Pilate waght wawa yaka, "Ikta 4
mamook mika halo killapie wawa?
Nanitch kahta hiyu ikta klaska witness
kopa mika."

Pe Jesus halo ikt wawa; pe Pilate 5
kwah.

Kwansum kopa okoak feast yaka 6
mash ikt man klahoney kopa skookum
house, klaxta okoak tillicum tikke.

- 7 Pe ikt man midlite kopa skookum house, yaka name Barabbas, waght konsik man konamoxt yaka, klaska fight kopa tyee pe mamook memaloost tillicum.
- 8 Pe kanaway okoak klaxta lolo Jesus, klaska hyas wawa kopa Pilate spouse mamook ikta yaka kwansum mamook kopa klaska.
- 9 Pe Pilate killapie wawa kopa klaska, "Nawitka mesika tikke spouse nika mash klahoney okoak King kopa Jews?"
- 10 Kewa yaka kumtux okoak tyees laplet klaska sick tumtum, kakwa klaska kow Jesus.
- 11 Pe okoak tyees laplet klaska pot-latch wawa kopa tillicum, spouse klaska tikke Barabbas.
- 12 Pe Pilate killapie wawa kopa klaska. "Ikta alkie nika mamook kopa okoak man mesika mamook name King kopa Jews?"
- 13 Pe klaska waght hyas wawa, "Mema-loost yaka kopa cross."

Pe Pilate wawa kopa klaska, " Ikta 14
yaka mamook mesatchie ?" Pe klaska
elip skookum wawa, " Memaloost yaka
kopa cross."

Pe Pilate tikke potlatch kloosh tum- 15
tum kopa klaska, kakwa yaka mash
klahoney Barabbas ; pe kopet yaka
mamook lewhet kopa Jesus, pe yaka
potlatch kopa klaska, spose memaloost
yaka kopa cross.

Pe okoak soldiers lolo yaka kopa 16
Praetorium, ikt hyas house, pe klaska
haul kanaway okoak soldiers.

Pe klaska mamook midlite tyee pa- 17
sissie kopa yaka ; pe klaska mamook
seahpo kopa needle stick, pe mash kopa
yaka latet.

Pe klaska he-he wawa kopa yaka, 18
" Hail, King kopa Jews."

Pe klaska kokshut yaka latet kopa 19
stick, pe klaska mamook toh kopa yaka,
pe klaska whim klaska lapee pe pray
kopa yaka.

Pe alta klaska kopet he-he kopa yaka, 20

pe klaska mash okoak tyee pasissie pe mamook midlite yaka iktas, pe lolo yaka kah alkie klaska memaloost yaka.

21 Pe klaska klap Simon, ikt Cyrenian man, papa kopa Alexander, pe Rufus, pe klaska mamook yaka lolo okoak cross.

22 Pe klaska haul kopa Golgotha, yaka delate name "Memaloose tillicum latet."

23 Pe klaska potlatch yaka wine kanamoxt myrrh, pe yaka halo iskim.

24 Pe kopet klaska mamook nails yaka kopa cross, pe klaska mamook kokshut yaka pasissie pe mamook lot kahta kanaway man iskim.

25 Pe kakwa kwaist tintin tenass sun klaska mamook memaloost yaka kopa cross.

26 Pe midlite okoak tzum saghalie kopa yaka latet OKOAK KING KOPA JEWS.

27 Pe klaska waght memaloost kopa cross moxt kapswalla man, ikt kopa yaka right hand, pe ikt kopa yaka left hand.

Kakwa midlite tzum kopa Saghalie 28
Tyee wawa, "yaka konamoxt mema-
loose kopa mesatchie man."

Pe klaxta cooley wake siah, klaska 29
hulhul klaska latet, pe skookum wawa
kopa yaka, "Nawitka mika kokshut
okoak Sunday house, pe waght mamook
kloosh kopa klone sun.

Kloosh mika chako keekwillie kopa 30
cross."

Waght okoak tyees laplet hehe kopa 31
yaka pe klaska wawa, "yaka save
huloima tillicum, wake kahta yaka save
yaka self.

Kloosh okoak Christ, okoak King 32
kopa Israel chako keekwillie kopa cross,
pe alkie nesika nanitch, pe believe."
Pe okoak konamoxt yaka kopa cross,
klaska mesatchie wawa kopa yaka.

Pe alta sitkum sun, pe chako pola- 33
kalie kopa kanawa kah okoak illahe,
pe klap kopa klone tintin.

Pe alta klone tintin pe Jesus hyas 34
wawa, "Eloi, Eloi, lama sabacthani ?

Nika Tyee, Nika Tyee, ikta mamook
mika mash nika ?”

35 Pe ikt-ikt okoak tillicum kwolahn
ikta yaka wawa, pe klaska wawa,
“Nanitch, yaka tikke Elias.”

36 Pe ikt man lolo vinegar midlite kopa
sponge, pe yaka mamook midlite kopa
stick, pe mash kopa yaka laboosh ; pe
yaka wawa, “Kloosh kopet, alkie nesika
nanitch spouse Elias chako mash yaka.”

37 Pe Jesus hyas wawa, pe memaloost.

38 Pe okoak hyas sail midlite kopa
Sunday house delate kokshut kopa
sitkum.

39 Pe okoak tyee kopa soldiers kumtux
kahta Jesus wawa, pe kahta yaka mema-
loost ; pe yaka wawa, “okoak man
delate Saghalie Tyee Tenass.”

40 Waght midlite hiyu klootchman kopa
siah, ikt yaka name Mary Magdalene,
pe Mary mamma kopa tenass James,
pe Joses, pe Salome.

41 Kwansum yaka kloosh nanitch Jesus
spouse yaka midlite kopa Galilee. Pe

waght hiyu klootchman klaxta chako
konamoxt yaka kopa Jerusalem.

Pe alta chako tenas polakalie, pe 42
klaska mamook kloosh kopa sabbath,
to-morrow.

Joseph kopa Arimithea, delate kloosh 43
counsellor, waght yaka kloosh nanitch
spose Saghalie Tyee chako, yaka skoo-
kum tumtum, klatawa kopa Pilate,
tikke klap okoak Jesus yaka itlwillie.

Pe Pilate tumtum halo yaka delate 44
memaloose; pe yaka mamook chako
okoak tyee kopa soldiers, tikke kumtux
spose Jesus delate memaloose.

Pe alta yaka kumtux nawitka Jesus 45
memaloose, pe yaka potlatch yaka
itlwillie kopa Joseph.

Pe yaka mamook kloosh sail pe 46
mamook kow kopa Jesus yaka itlwillie,
pe mash kopa stone memaloose house,
pe yaka waght mash stone kopa lapote.

Pe Mary Magdalene, pe Mary mamma 47
kopa Joses, klaska nanitch kah yaka
midlite.

Chapter 16.

- 1 Pe alta kopet okoak sabhath, Mary Magdalene, pe Mary, mamma kopa James pe Salome, klaska lolo kloosh hum iktas spouse mamook lamachin kopa yaka.
- 2 Pe delate tenas sun kopa Sunday klaska chako kopa okoak memaloose house, chee chako sun.
- 3 Pe klaska konamoxt wawa klaxta alkie mash okoak stone kopa memaloose house lapote ?
- 4 Pe alta klaska nanitch, pe okoak stone halo midlite, pe delate hyas.
- 5 Pe klaska cooley kopa memaloose house pe klaska nanitch tenas man midlite kopa right hand, yaka iktas long, pe t'kwope, pe klaska chako kwass.
- 6 Pe yaka wawa kopa klaska, "wake mesika kwass ; mesika tikke klap Jesus of Nazareth, okoak yaka memaloose kopa cross ; yaka midwhit ; halo yaka

midlite yakwa ; nanitch kah klaska mash yaka.

Pe kloosh mesika klatawa mamook 7
kumtux yaka disciples pe Peter, yaka
klatawa elip kopa mesika, cooley kopa
Galilee ; yawa alkie mesika nanitch
yaka, kakwa yaka wawa kopa me-
sika."

Pe klaska klatawa klahoney, pe hyak 8
mash okoak mem^aloose house ; kewa
klaska hul-hul, pe delate kwah ; pe halo
klaska mamook kumtux klaxta, kewa
klaska kwass.

Alta Jesus midwhit tenas sun, okoak 9
elip sun kopa week, Mary Magdalene
elip nanitch yaka, okoak ankutte yaka
mash sinamoxt tamanawus.

Pe yaka klatawa mamook kumtux 10
okoak yaka konamoxt, kopa kah klaska
sick tumtum pe cry.

Pe alta klaska kumtux ikta yaka 11
wawa, pe kahta yaka nanitch Jesus
alive, pe halo klaska believe.

Waght okoak moxt disciples nanitch 12

yaka, kah klaska cooley kopa klaska illahe.

13 Pe klaska klatawa mamook kumtux okoak klaska konamox, pe waght klaska halo believe.

14 Kyimta Jesus klap kah okoak totlum-pe-ikt midlite iskim mukamuk, pe yaka skookum wawa kopa klaska, kahta kul tumtum, pe halo believe okoak klaxta nanitch yaka, kyimta yaka midwhit.

15 Pe yaka wawa kopa klaska, "kloosh mesika klatawa kopa kanaway kah illahe, pe mamook kumtux okoak kloosh yiem kopa kanaway klaxta tillicum.

16 Pe klaxta believe, pe klap baptized, alkie yaka saved, pe klaxta halo believe alkie yaka klap mesatchie.

17 Pe klaxta believe alkie klaska klap skookum; Kopa nika name alkie klaska mash klahoney tamanawus; alkie klaska wawa kopa huloima lalong;

18 Alkie klaska iskim okoak mesatchie snakes, pe spouse klaska mukamuk

poison alkie halo klaska klap kul;
alkie klaska mamook midlite lemah
kopa sick, pe alkie klaska chako
kloosh."

Alta okoak Tyee kopet wawa kopa 19
klaska, pe yaka klatawa kopa saghalie,
pe midlite kopa Saghalie Tyee right
hand.

Pe klaska klatawa klahoney, pe yiem 20
kanaway kah, okoak Tyee konamoxt
klaska, pe mamook skookum okoak
yiem. Amen.

BILLING AND SONS, LTD.,
PRINTERS,
GUILDFORD, ENGLAND

